

嘉業堂
叢書

傅與礪詩文集

第二冊



傅與礪詩集卷之五

七言律詩

道士礪阻風過呂相墓

危檣風急晚相依
閒謁荒墳帛落暉
白酒暫謀同輩飲
青山因感昔人非
荆襄萬里空殘堞
吳楚千帆掠斷磯
今古高門總正墓
英雄何用苦沾衣

韓淮陰廟

淮陰萬古英雄恨
楚樹荒荒夕照殘
水夾廢城春草合
雲昏遺廟野花寒
封齊安用眞王印
興漢空餘大將壇
高帝旌旗俱寂莫
斷碑零落後人看

桃源道中

憶曾親到武陵回忽遇桃源偶自猜豈有水通仙洞去
祇疑花映縣門開日明畫戟官船上風獵黃旗御膳來
想得故園寒食節共言游子近燕臺

宿遷舟行

天涯風物最關情每問舟人計驛程幾處新蔬隨晏食
誰家豔杏照春晴水通淮海波濤壯地入青徐土壤平
正憶祓除逢上巳可慙寥落過清明

黃河

黃河萬古來天上白日千雷鬪地中浮水巨壺時出曝
傍巢靈鵲自知風神珠化濁何由得仙木尋源或可通
聞道千年聖人出此生何幸見時豐

徐州

斷山數里見浮屠水樹微茫映日疏舟楫盡經危石過
人煙稍近白雲居朱陳縣遠思遺俗楚漢臺荒想故墟
萬古風帆自來往新詩吟罷獨躊躇

沛公亭

遙山寂寂對危亭壞礎敲沙柳自青四海久非劉社稷
千秋猶有漢精靈豐西水散煙沈浦碭北雲來雨八庭
坐想酒酣思猛士歌風臺下晚冥冥

濟州遇大風

黑風揚海口欲翻黃塵蔽天愁卽昏牽江百丈有寒色
轉野孤蓬無定根少年涉歷深世故長路艱難銷客魂

坐笑杞人真不慧浮生久已信乾坤

會通河伯祠晚眺

水神祠下晚維舟閒倚穹碑誦遠遊西日射雲明獸尾
北風吹土集貂裘漳川近繞幽燕出汶水分兼濟漂流
過客豈知疏鑿苦當時荷鍤幾人愁

至京

京國古爲形勝地野人今識帝王居無時雲氣浮金闕
盡夜奎文映玉除豈復常何須論事蚤聞司馬已成書
袖中獨有長楊賦欲向何門曳客裾

詠懷

一春風浪淹行客六月塵埃滿上京郡館朝煙同杵臼

故園暮雨隔柴荆西州近日猶防寇南詔經年久用兵
獨夜起瞻龍虎氣五雲終繞鳳皇城

駕發

天門曉啟黃金鑰路馬遙翻碧玉蹏銀燭熒熒花外出
翠蕤冉冉柳邊迷千官劍佩屯雲合五衛旌旗擁日低
後夜龍沙駐清蹕侍臣不寢驟鳴雞

呈王繼學大參時領江東憲

丈人文律擅風騷往昔朝中屬望勞宣室近聞徵賈誼
漢廷重見遣王褒蒼松雪後森森直玉樹風前凜凜高
幾處瘡痍待蘇息遙瞻使節下江皋

蚤年弄筆向山阿行徑春深長薜蘿逸駕未能攀屈宋

苦心虛擬過陰何南遊澤國黃塵滿北望都門紫氣多
最說蓬萊舊仙伯妙音時復奏雲和

登樓

樓上秋風吹畫屏樓前秋思滿都亭金河水去涓涓碧
瓊島雲來冉冉青近見蕭何成第宅舊聞汲黯在朝廷
明時進用多英傑迂腐深慚守一經

秋興

天上旌旗卷暮寒人間鼓角送悲酸瑤池落日迴青鳥
月殿浮雲掩素鸞楊柳漸稀秋瑟瑟芙蓉已老露漙漙
砧聲苦近南鄰客寥落羈懷強自寬

落木蕭蕭滿帝畿候蟲處處趣寒機客星入斗秋深見

神女行雲日晏歸復喜諸公扶社稷祇憐弱弟奉庭闈
短章諷罷頻回首日送江南鴻雁飛

梧桐樹晚細含煙闥闥門深總映天龍去鼎湖雲漠漠
鶴吟華表月娟娟東都日望金輿發南徼猶驚羽檄傳
只在忠良勤夙夜五陵佳氣故依然

白日遙看錦繡懸重重樓閣隱青煙化城或在諸天外
方丈長疑弱水連每說神僧飛杖錫更聞童女上樓船
西風日暮何蕭瑟一度憑高一惘然

敝裘已畏早寒侵歲月祇驚久客心莫倚長卿能作賦
始知季子故多金天門守虎星辰冷雲氣從龍霧雨深
直北關山時極目昔人聊復短長吟

題張齊公祠

將軍結髮事先朝，百戰山河血未銷。
總說霽雲能慷慨，兼聞去病最嫖姚。
煙塵劍戟迷秋峒，風雨旌旗落暮潮。
自古英雄須廟食，精靈何待楚辭招。

送湘中李從事赴郴幕

長沙上游山水窟，郴陽自古說名邦。
天圍翠岳連三楚，地合清湘赴九江。
歸去收書經石室，坐來拄版對雲窗。
西風慘澹都門別，莫愛青樓倒玉缸。

和宋子與病中

知君憔悴對醫師，總爲庭闈接夢思。
去國休題王粲賦，憂時苦愛杜陵詩。
關河落日傳飛箭，城闕高秋建畫旗。

自有羣公勤輔翊不妨羈旅暫棲遲

寄漢陽黎暹州

郎官湖頭秋月輝大別山下暮煙微鄰家竹好題詩到
別墅花濃放棹歸穉子攤書黃葉下野人送酒白魚肥
惟應對客多情興解念征塵染素衣

寄馮架閣

風沙獨走燕臺路秋思長懸楚觀雲直北橐駝終日見
向南鴻雁幾回聞過門每憶逢春雨迂轡能忘坐夕曛
數就行人問消息知名總說漢馮君

崇天門朝賀

輦路塵清列羽林侍臣星嚮肅森森風含鳳吹青冥闕

日射龍旗紫極深兩廡佩趨臨水玉九門詔出映泥金
從來湯武須傳業更在伊周老盡心

雪中次元茂才

北闕今晨雪滿墀腐儒憂國畏人知月寒弱水迷三島
雲暗蒼梧失九疑瑞木細飄天上葉梅花潛發嶺南枝
山陰那得乘佳興起繞前軒自詠詩

客館對雪

主人並馬清晨出獨客搖毫白晝吟空院雪花時近眼
故園梅蕊總關心天迷漢節南征遠日冷燕臺北望深
但使年豐成國用敢論遊子少黃金

元日

漂零京國逢元日俯仰乾坤任四時
天上椒花虛作頌江南梅蕊廢題詩
三山日動蒼龍闕五筦雲迴翠鳳旗
元老議成周典禮小儒思見漢官儀

正月十七日麗正門觀迎接口號

南徼旌旗萬里迴中天城闕九重開
龍門仗簇青雲起鶴禁香通紫氣來
父老多流去日淚公卿不乏濟時材
已聞奉璽歸金室早聽趨朝進玉杯

和宋架閣病後出遊

近說能詩宋之問還同多病漢相如
出門跨馬驚春晚臨水聞鶯似夢餘
柳邊苑路通飛觀花底宮泉溜決渠
每歷鳳城多雜興須君把筆更來書

送賀尙書致仕後赴召上都

使者微行立曉風宰臣傳詔守離宮關中舊憶留蕭相
江左俱看起謝公路經琴峽秋聲滿天繞灤河御氣通
聞說至尊勞睿想莫令行色後賓鴻

送唐子華赴嘉興照磨

子華名棧 □ □ 人善畫

聞君秋思滿南湖行李今晨發帝都幕府初乘從事馬
江城還憶步兵鱸樹浮白日山侵越潮蹴青天海入吳
閒暇憑高動詩興須成一醉埽新圖

和孫太常元日

日射天門海霧晴雪飄仙路島風輕柳邊仗出開旂影
花底朝回散佩聲爲客頻占新歲事思親復起故鄉情

不論萬里羈離苦惟願中朝政化平

灋陽橋

謝家作橋涪水上行客題詩江霧中天接五谿南去永
地連三楚北來通青龍暮見雲汀溼烏鵲秋閒月渚空
聞說道旁多駿馬何人環佩立西風

次韻春雪

才見天花散碧寥卽看庭樹失青條侵香靜向金虬滅
拂舞輕兼綵燕飄只怪春叢俱爛熳可知年穀最豐饒
蹇驢暮出多詩思卻恐旁人擬灞橋

出郭

晴光縹緲汎青春遠色氤氳動紫塵出郭自因芳意早

尋谿兼得野情新
花邊古寺翔金爵
樹底高墳臥石麟
卻倚層崖望城闕
上方雲氣繞龍鱗

送會稽方泳道之松陽令

松陽令尹之官去
三月都門柳拂衣
作郡舊聞成式在
去鄉今見買臣歸
春花繞縣居人滿
秋柿連村過卒稀
從此弦歌徧閭里
看君鳧舄近雲飛

寄河閒趙運使

雪盡官河春水生
移家還出鳳皇城
竹閒退食占靈鵲
花外題詩聽早鶯
鹽井青煙晨縹緲
漕溝素月夜分明
京華久客遙相憶
欲託音書不稱情

送臨川僧明極

天寧堂中雲所居生公聚石意何如山前振錫應逢鶴
池上開函或召魚有時風樹鳴珠網當晝天花墜寶書
豈憶今晨送師處薊門南望說鄉閭

送馬伯誠書大典恩授學官待次歸

蚤聞獻賦擬揚雄晚信傳經出馬融載筆舊登天祿閣
將書能到大明宮苑花送酒歸時發江樹迎船去處通
會待詩書化干櫓青鐙重約故人同

送杜德常御史赴西臺

御史才華舊省郎翩翩雲路起鵷行天回紫閣明奎壁
地切烏臺動雪霜分陝定存周禮樂過秦猶有漢文章
欲因巡郡還搜訪別酒臨風意獨長

繡衣此別定如何
驄馬西行處處過
驛樹蒼茫連灞澗
江花浩蕩過岷峨
三秦久訴誅求盡
六詔仍聞警急多
早聽封章切肝膽
爲憐編戶困干戈

憶到京華未相識
將詩往往向人傳
祇慙燕石登重價
豈有驪珠出九淵
青雲滿路逢傾蓋
白日臨歧送著鞭
好去城南訪遺譜
杜陵自古盛才賢

送方從事赴潮州

闕下風流祕省郎
移官萬里向潮陽
樹邊海氣浮天闊
雲底瀧流出地長
見客惟應辭薏苡
思親定復倚桄榔
諸公佐郡多能事
日對韓山送酒觴

都門十月把征衣
腸斷千峰木葉飛
江上也知鱸膾美

嶺南還恐雁書稀
梅花月落晨趨府
樅樹雲生晝掩扉
幕下故人如問訊
帝鄉爲客未能歸

寄潮州袁經歷

去歲京華歎別離
千回坐到州時潮
人載酒昌黎宅
海客移船廣利祠
南去祇憑相憶字
北來頻問近題詩
嶺梅處處開應好
何得春前寄一枝

送蒙古潘學正

奎宿凝華協帝符
龜圖呈畫照坤輿
衣冠治定通重譯
竹帛文同變六書
分教已從官獨冷
致身寧論術猶疏
明朝鼓棹瀟湘去
處處秋旂薦白魚

次韻元日朝賀

宮漏催朝燭影斜
千官鳴玉動晨鴉
交龍擁日明丹陛
飛鳳隨雲繞畫車
宴罷戴花經苑路
詩成傳草到山家
小儒未得隨冠冕
遙聽鈞天隔綵霞

對雨懷揭監丞病起

微雨霏空坐轉添
把書終日對廉纖
霧交忽復深連海
風引時能近拂簾
樹底征鞍愁易溼
花邊坐席喜相霑
孰知病起多幽思
行樂時時過畫檐

答張自觀自江右贈詩至燕

十年江國苦淹留
萬里京華志遠遊
坐客浪傳鸚鵡賦
市人爭指驕驕裘
久疑傳說騎箕尾
空使張華望斗牛
此日朝廷盛文物
春來相望莫深愁

和揭監丞聞王少監宅二月梅花盛開

南州臘近梅偏盛北地寒多暖始繁
總爲蕭疏含冷色獨判遲暮答春恩
誰家愛樹開幽徑此日逢花憶故園
何遜能詩意無恨莫將愁思繞孤根

送周士稚歸盱江二首

華子岡頭春色幽麻姑洞口好山稠
天晴暗草生歸思日暮濃花喚別愁
歧路不堪長送客故鄉那得便同舟
知君文力驅江海豈學蘇秦著敝裘

爲客京華歲易遷看君游倦獨幡然
更同夜語何由得只漫春還也自賢
作賦未成前殿奏論經猶擬後生傳
仲舒況有賢良策漢主經營最盛年

和孔學文從奏廷春閣

宮漏沈沈曉仗移
袞衣當殿聽朝時
風含雞舌飄青瑣
日射龍鱗動赤墀
奏對御筵多密近
退趨春院總委蛇
喜聞近日稀游幸
閣下儒臣出每遲

題王晉之崆峒山房

君家堂上小崆峒
開鑿猶疑見禹功
青澗每愁靈雨至
白虛常喜細泉通
緱山遠色來琴底
艮岳餘姿落座中
欲侍軒轅親問道
廣成何許倚秋風

秋日巡山和王君實四首

大駕常年幸舊都
守臣巡徼禮如初
西山雲氣來仙島
北極天文繞帝居
龍去欲騰秋水劍
雁回疑得上林書

山河滿目今全盛文武才多國未虛

九重城闕擬清都萬井閭閻倍國初但見貔貅無急警
始知雞犬亦安居鉤陳月轉秋移仗太一天低夜降書
聖主夙興思輔治由來廊廟不宜虛

巡山千騎接神都穀滿秋田露下初烽火不聞乘夜警
人煙多見入雲居百年禮樂成周典萬古山河列漢書
喜有新詩繼風雅諸公才氣總凌虛

衣冠如雨耀神都郊甸新涼拂馬初日月迎臨黃閣貴
風雲遙限紫宸居少陵謾擬陳三賦司馬先能著八書
想見九關嚴守虎玉堂金殿最清虛

七月十一日赴安南

燕城秋早五雲開路入南交幾月回奉使始從天上出
行人爭看日邊來班超萬里終投筆郭隗千金更築臺
聖主恩深極炎海伏波銅柱任蒼苔

馬上

四牡光華照早秋路人傳看使交州青雲北起飛龍闕
白日西明洗馬溝山上浮屠兵後石道邊華表古時正
據鞍欲訪前朝業沙草微茫水自流

涿州樓桑村先主廟

先主君臣並材傑天傾炎漢苦須扶曹瞞力盡纔分國
葛亮謀成竟託孤道路只今通隴蜀山河無復限荆吳
行人爲指樓桑廟腸斷西風散白烏

孤村縹緲見靈祠廢宅蒼茫失故基蜀鬼夜還風滿蓋
涿人朝祭雨霑旗璽文定復歸寒水桑影猶疑覆短籬
終古鄉閒有遺恨衣冠空想漢威儀

登眞定龍興寺閣

網戶層層映日開寶欄曲曲近雲回水連鉅鹿河流合
山走封龍岳氣來天樂有時飄下界佛香終日覆前臺
微軀新病宜高爽倚柱長吟莫卻迴

公事畢重發京師

故人送別古城頭已去重來不敢留司馬舊爲持節使
洪喬今作置書郵路蟠冀魏通江漢山盡荆吳入斗牛
卻到日南應萬里早春還憶鳳皇樓

范陽

督亢陂前草沒沙武安廟下客思家西風落日猶驅馬
北地秋陰亦見蛇不勞鄒衍重吹律何得張騫獨泛槎
從此南征思何限象林銅柱更天涯

欒城驛

極目荒城斷復連古人遺跡種爲田陳餘墓沒秋雲外
欒武臺荒夕照前豈有聲名驚絕域惟將文字記流年
西風傳舍塵蕭瑟南北經行亦可憐

趙州石梁

隋李春造上有張果老驢跡

趙州南梁石壯哉李春舊刻暗塵埃水流日月隋唐去
山卷風煙冀魏開白驢誰見仙翁度驄馬今迎使者來

卻恨秦人駕東海漫勞心力望蓬萊

磁州

曉出邯鄲露滿空武安紅樹起西風鼓山路向雲間落
滏水船從地底通秋草尙疑曹操冢野花無復趙王宮
古來富貴皆黃土莫笑行人憶夢中

武城

武城村南十丈塵百回立馬問行人古臺壞雨埋銅爵
高冢移雲臥石麟三分早恨英雄死九錫深悲命數頻
萬古漳河自來往秋來臨眺最傷神

淇州

湯陰縣前秋氣悲路人爲說紂亡時比干死諫猶存墓

西伯拘幽尚有祠草沒廢城牛牧遠樹侵官道鳥飛遲
西風落葉成多感行過朝歌卻賦詩

汴梁

汴上荒城繞故宮山頭危石墮秋風夷門市起聞嘶馬
梁苑樵歸見斷鴻鬪草尙餘殘後碧進花無復盛時紅
欲登高處腸先斷滿目閑愁賦未工

上蔡

上蔡城頭黃葉多聞雞看劍起長歌徒憐丞相東門尹
猶憶將軍半夜鵝樹底衣裳霑露雨馬前鐙火動星河
涼風滿路吹行鐸那似金門聽玉珂

汝南

驛騎如雲遠自天
眼中陳蔡鬱相連
高口映日飛黃霧
亂木含風舞翠煙
汝水近通城北路
確山遙帶郡西田
經過莫怪頻回首
無限秋懷攬轡前

武昌

武昌城中山氣涼
欲行還住意何長
荆衡樹暗來秋雨
江漢樓高下夕陽
禰衡作賦愁鸚鵡
李白題詩憶鳳皇
北去朝廷今未已
南征煙火日相望

登岳

衡陽煙樹翠重重
知有仙居近古松
采藥猶嫌山鬼識
誦經不使世人逢
日光冷射朱陵洞
雲氣晴熏紫蓋峰
惟恨南征逼霜雪
未能相逐徧攜筇

萬壑千峰次第開祝融最上氣崔嵬九江水盡荆揚去
百粵山連翼軫來入樹恐侵玄帝宅牽蘿思上赤靈臺
明年更擬尋春興應及瀟湘雁北迴

興安縣

亂峰如劍不知名篁竹蕭蕭送驛程轉粟未休離水役
負戈猶發夜郎兵百蠻日落朱旗暗九嶺風來畫角清
空使腐儒多感慨西南羣盜幾時平

謁羅池廟

柳州刺史愛羅池廟食千秋傍水涯隔座桄榔風瑟瑟
近檐橄欖露垂垂唐碑載事班前史楚曲迎神叶古詞
欲借題籤卜行役祇慙巫祝強知詩

書南寧驛

歲晚驅馳憶帝京北風回首重關情中天日月迴金闕
南極星辰繞玉衡父老尙須司馬檄蠻夷須用伏波兵
也知文德能柔遠傳道新恩欲罷征

次韻智禮部贈黃忠州

舊臨邊鎮早從戎新遣諸郎亦有功留在豹韜知合變
佩來龍劍識雌雄西山幾月烽煙定南土當年貢賦通
會見文翁化成俗不勞壯士挽強弓

書如月江橋市驛

迢迢旌節指天隅歷歷山川載地圖市發朝霞晴卷布
江生明月夜還珠禮從陸賈來時定俗自任延去後殊

親見蠻邦慕冠冕只今聖德似唐虞

瀘江

瀘江之水發南詔龍編古城居下流馮夷伐鼓迎漢節
泉客弄珠隨越舟鯨海遙連白日動鼇山近戴青天浮
層波莫據鼉鼉險日夜東歸未敢休

題天使館

元統三年頒正朔詔書還到極南開使旌入館青雲動
仙蓋臨江白日迴諭蜀豈勞司馬檄朝周終見越裳來
還家耆舊應相問文化如今遍九垓

卻侍姬

夜宿安南天使館主人供帳爛相輝寶香燼起風過席

銀燭花偏月照幃王母漫勞青鳥至文簫先放綵鸞歸
書生自是心如鐵莫遣行雲亂溼衣

落梅

梅蕊紛紛落小池粉牆猶護折殘枝臨風見影時堪惜
步月聞香妄自疑萬點撲檐飄乍急數回沾帽拂還遲
北來羌管多愁思好謝行人且莫吹

華林村

華林步頭江徑迂晴煙渺渺見村墟水邊茆屋圍青竹
樹底柴扉掩綠蔬國老把杯齊送別館人操紙解求書
歸程正及寒花發滿處清香逐使車

崇仁峽

扁舟夜宿魚龍窟久客常懷虎豹關歲暮思家成白髮
天涯持酒得青山張騫浪喜蒲萄入馬援終嫌薏苡還
天子只今勞遣使將軍何日遂平蠻

贈黃天瑞

臨江人

嶺外相逢春正寒知君能奔動衣冠風簾落子花搖席
夜燭收枰月轉闌松下或尋仙客對竹閒應任野樵看
由來此道通兵法卽遣籌邊也未難

寄雅正卿

送別都門秋葉飛臨岐猶記把征衣嶠南歲月鶯囀早
江北風沙雁過稀張騫奉使經年至馬援平戎幾日歸
卻望旌麾倍惆悵往來人事苦相違

桂林喜呂仲實僉憲至

正月交州奉使歸忽聞鞍馬發王畿嶺南瘴雨開銅柱
江上春雲逐繡衣草熱蟲蛇常並出樹深豺虎近皆肥
明朝按節勞咨訪邊郡於今未解圍

寄湖廣僉憲姚子徵

憶君驄馬赴金陵送別題詩久未能秋後也知鷹自擊
春來惟恨雁無憑洞庭地坼連青草林邑天迴帶白藤
南北驅馳只相望飛霜何處濯炎蒸

過故妻墓

湘皋煙草綠紛紛灑淚東風憶細君每恨姮娥工入月
虛疑神女解爲雲花陰午坐閉金翦竹裏春愁冷翠裙

留得舊時殘繡在傷心不忍讀迴文

洞庭連天樓

崔嵬古廟壓危沙縹緲飛樓入斷霞南極干峰迷楚粵
西江眾水混渝巴鮫人夜出風低草龍女春還雨溼花
北倚闌干望京國故人何處認星槎

和黎別駕飄然樓

老子樓居頗近仙樓東常繫泛湖船衣冠已任鄰人識
文字兼從過客傳桂夕把杯還問月花時吹管欲乘煙
登臨莫苦懷鄉國著述猶堪託暮年

送羅用賓靖州教官兼簡某從事

柳色新袍照洞庭西南幾夜候文星水浮七澤通黔白

山擁三苗過峽青銅鼓不勞歸鑄馬絳帷還見坐橫經
府中從事君知己應共哦詩使六丁

龍翔寺

梵王宮殿倚青冥先帝旌幢擁百靈寶網自鳴空裏樂
琅函時出賜來經近山鳳去花仍碧遙海龍歸樹獨青
玉輦宸遊竟寥廓行人揮淚讀新銘

鳳皇臺

太白題詩鳳游處古臺蕭索換流年風流偶出齊梁後
文藻猶含晉宋前淮水夜明滄海月石城春暗秣陵煙
古來宮殿俱無迹風雨憑高獨黯然

候友人不至戲作

儀真城下菖蒲節晴日江頭錦繡文旗影送船侵樹過
笛聲催鼓隔花聞雙龍鏡化閒風雨玉馬歌沈暗水雲
日暮故人期未至誰家看舞石榴裙

送奎章典書王可賓歸陳

儒臣侍講黃金殿閣吏依光白玉除親在未沾三釜祿
使回先寄數行書叢臺日暮嘯烏烏蔡水霜清見鯉魚
歸到高堂說文治五雲遙指帝王都

送張良佐歸鄉

知君京國久飄零舊隱南宮樹色青平子暮年能作賦
志和初歲已明經石田每恐荒秋雨銀漢虛勞問客星
聞道鄉心與詩思夜隨寒月繞柴扃

挽劉漢璋

舊遊京國夢林泉老就揚州築墓田海上遂疑徐市去
濟南誰得伏生傳藥欄寂寂臨春水松館蕭蕭對暮煙
身後愧君名或泯故人哀思倍淒然

送篤御史之南臺

旅館天寒盡日空繡衣臨訪走兒童已聞俗客驚題鳳
更訝鄰人失避驄短剡實愁歸後見清尊虛擬別時同
明朝振策秦淮道惆悵煙雲隔斷虹

金陵臺畔栢森森馬首飛霜已滿林定有文章兼論建
豈無風采屬登臨東隅地限諸夷遠南服天圍五嶺深
吳楚誅求極困傲干戈饑饉轉關心

送趙仲禮御史兼呈王侍御

文章御史久爲郎南赴金陵道路長百粵雲山連楚大
六朝煙樹入隋荒清秋按郡行驄馬落日登臺詠鳳皇
新喜諸公振風采早聞當道去豺狼

都門相送意躊躇別路秋生白羽車霜雪總看鵬去疾
風煙那問雁來疏嶺南坼堠愁烽燧江左誅求畏簡書
白面少年空解事繡衣行縣定何如

建業城頭烏亂唳知君感古夜聞雞荆揚貢賦元趨冀
晉宋文章漸入齊草疏或依松影坐哦詩應就竹陰題
書來肯憶京華客日日長衢聽馬嘶

袞袞晴雲塞要津終聞聖主用儒臣蜀都文物來西漢

奎閣圖書近北辰此日賜冠簪獬廌暮年留像畫麒麟
極知風俗須揚激肯使賢才但隱淪

賜書南粵初歸日駐楫秦淮欲暮天嘯詠偶經梁舊寺
登臨猶憶晉諸賢謝安別墅蟲鳴裏王導新亭鳥去前
多謝府中賢侍御別時能作送行篇

和馬中丞送尹子元按部湖廣

法星夜入斗南天人候乘驄動隔年嶺外轉輪疲郡邑
海隅征戍廢田園馬援定地思標柱蘇武歸朝恨齧氈
想見巡行得風俗尙論信賞勸才賢

題奧屯主簿藏其叔滄江公翰墨

從父舊爲湖北使老年亦就漢陽居晴登大別題黃鶴

暖立滄江翫白魚，杜位未忘工部學。庾郎休慕右軍書，
只今耆舊凋零盡。撫卷傷懷淚滿裾。

次韻曾士敏寄其子經筵典書元傑二首

南豐老人鶴髮稀，遙憐令子客邦畿。步隨玉佩趨延閣，
書發金繩對衮衣。休怪赤騮終日去，也知蒼隼得秋飛。
江邊吟罷無人見，拄杖時能陟翠微。

天涯遊子日思歸，行李何時發帝畿。司馬未論金換賦，
買臣終欲錦爲衣。紫駝車動秋塵合，黃犬書回暮雪飛。
我亦鄉心滿江浦，千山煙樹正霏微。

宋氏西亭

宋家亭子渭城西，賓主幽尋每杖藜。把酒柱間桑樹遠，

被衣牆下麥苗齊
雷霆暝鬪龍門石
煙霧晴生瓠子隄
何日相從覽奇勝
新詩還對野人題

重午寓揭公館

翰林宅中值重午
節物驚人心欲摧
汨羅萬古煙波去
幽薊今朝風雨來
山中菖蒲已可服
庭下石榴猶未開
主人總有故園意
與客慰藉共傾杯

送熊天瑞南歸

豫章先生筋力優
旣老攜書能遠遊
風煙迤邐燕薊晚
日月蹉跎梁宋秋
青鐙獨夜有歸夢
白髮終年無客愁
京國今晨卻南去
將詩萬卷更何求

送林彥廣祠南北鎮

中使傳香下玉墀，儒臣代祀出金闈。
旛幢北起開恆岳，舟楫東迴入會稽。
望海也知晨駐馬，渡江休信夜然犀。
石山見說多仙氣，應得從容散杖藜。

詠林廣文種竹

高齋叢竹珍如玉，手種階前看發生。
故土已兼雲帶至，新梢都謝雨催成。
坐中曙接淇園綠，檐下秋含嶰谷聲。
見說主人多野趣，客來從看不通名。

舊葉蕭蕭槁復青，新叢細細斬還生。
劇當醉日愁仍損，澆過炎天訝忽成。
步月獨歸貪翫影，臨風閒坐喜聞聲。
相過況是無塵俗，青簡留題最盛名。

寄王君實

北望衣冠憶省郎，遠隨車駕幸灤陽。
苑中苜蓿空騏驎，池上梧桐起鳳皇。
中使有時傳賜酒，近臣何處避含香。
上林此日無來雁，吟罷題詩欲斷腸。

遊子江南生事微，五年京國夢柴扉。
彈冠總爲王楊在，垂橐虛隨陸賈歸。
藜藿已秋仍寄食，芰荷當暑未成衣。
諸公也念求升斗，日夜高堂白髮稀。

送王思文上舍

京華日夜憶庭闈，路接南天思欲飛。
衡岳數峰開縹緲，洞庭千樹入霏微。
館中共惜何蕃去，江上應逢宋玉歸。
來歲花開擬相覓，預愁煙雨溼春衣。

題涑從古壽藏可居亭

浮世百年那得知，正原同盡不須悲。雲間拔宅星河冷，海上求仙日月遲。蓋棺只合生前定，荷鍤徒勞醉後隨。絕愛可居亭下客，青山相好卽相期。

山中築室真堪老，身後知歸卽是仙。預斷竹根開祕壤，親栽松樹繞空阡。一生慷慨飛鳶外，千歲風流化鶴前。想見登臨增曠達，酒壺碁局任流年。

送孫伯起掾嶺北

久爲掾吏趨公府，忽去親朋赴朔城。黑水舊聞龍北起，青山惟見雁南征。蒼茫部落連諸邸，迤邐山河接兩京。王室由來重藩翰，省郎切莫負才名。

北去頻聞霜雪多，驛程猶是過灤河。悲風絕幕迴蒼隼。

落日穹廬臥紫駝行色且謀寒夜飲別懷休憶醉時歌
都門已隔千行柳況復鄉山老薜蘿

題紀靜卿竹圃

聞君種竹今成圃繞舍青青手自治花鳴犯根休聽劇
韭畦妨筍更教移卽通好客深開徑稍斷行人遠插籬
因憶故園荒欲盡爲君悵望一題詩

寄鄂季弟幼霖并寄仲弟次舟

弟兄終歲長羈旅南北何時卻定居春至數瞻衡岳雁
秋來猶食武昌魚每愁年長須經事卽恐家貧廢讀書
仲氏應門獨辛苦平安消息近何如

吾親霜鬢日紛紛爲客艱難不使聞養老只須常善飯

生兒何必總能文書同洛下思黃耳心似河陽見白雲
季弟還家報兄好歸期猶恐過春分

聞張吏部督海運歸詠懷奉簡

日邊雙節下滄溟雲際千艘赴驛亭直爲邦畿須轉粟
也因江海念流萍玉京永夜瞻卿月銀漢清秋識使星
待盡西風始相見客愁如酒一時醒

絕域歸來歲月過應憐辛苦涉風波楚人不得輕毛遂
漢使因能屈趙陀自古諸谿連盜賊祇今五嶺徧干戈
微官乞就江南地直念庭闈白髮多

別山北憲掾傅子通

邊城置驛往來通憲府臨藩政化同三語忽傳收薦鴟

一經猶得佐乘驄
遼東地盡玄菟闕
塞北天寒白霽空
此去行秋勿容易
吾先臺閣舊生風

北望車塵損客顏
洽陽萬水復千山
乾坤歲暮多離別
道路天清忽往還
海鶴朝呼風滿柱
冥鴻夜度月臨關
此時馬上應相憶
卻羨歸雲盡日閑

九日同陳道之攜酒過揭公

每歲登高喜重九
今秋天地獨堪驚
青山卽恐西風滿
白日常愁北極傾
故人對酒思陶令
今上求言憶賈生
忽見新詩使腸斷
看雲對菊涕縱橫

安南使饋香因分送京下諸公

南粵名香屑異材
遠人持贈比瓊瑰
采經銅柱秋雲溼

熏對朱崖夕雨開人朝喜見朱鳶定充貢還隨白雉來
久憶諸公擬分送卻愁蕙苴誤相猜

送著書曹裕之赴銓

京國風塵共起居朝廷文物用吹噓不緣張斐能推律
誰識虞卿解著書江路月明梅漸發薊門霜落柳全疏
看君被檄南州去卽見青雲動里閭

酬黎別駕

天涯爲別動經年空有音書託雁傳時見遠人來闕下
不忘孤客老江邊山亭訪竹雲生褐野寺尋僧雪擁氈
想得郎官湖上月清輝長共此心懸

送東宮說書周仁遠歸里

知子京華厭久居
慈闈多病憶江魚
雲深鶴禁辭通籍
月暗螺江夢倚閭
別騎冷隨沙樹遠
歸舟晴照野梅疏
獨慚歲暮仍羈旅
腸斷千峰隔敝廬

傅與礪詩集卷之五

傅與礪詩集卷之六

七言律詩

元日朝賀後聞赦

紫殿風雲會搢紳
榮光又逐歲華新
近時鐵馬清南海
昨夜金雞動北辰
法令已行秦郡縣
禮儀仍見漢君臣
獨勞聖主哀黔首
還以殊恩服遠人

春蒐和賀伯更

行殿千旗拂紫宮
臂鷹年少喜遭逢
子雲賦好誰能薦
司馬才高不得從
天外帛書無過雁
苑邊雲氣盡成龍
金輿早晚還雙闕
闕體尋常慎九重

鷹隼晨飛馬正驕
駕鵝春過雪初消
鳴鞘捷應金鞬脫

作言一
薦鼎肥勝玉筋挑朱袖拂雲歸苑近翠華吹雨度山遙
卽今誰入非熊兆空使愁心似柳條

送臨川黃次峰南岳巡檢

客遊帝城今幾春忽聞歸思滿江濱誰憐日月淹文舉
自愛雲山入徼巡瀟湘樹合瞻南岳臨汝花開憶北人
若過長沙訪耆舊更因迴雁寄書頻

送趙宗吉御史兼寄篤敬夫

只今臺閣用文儒幾處瘡痍待掃除念我北遊同社燕
看君南去食時魚雲霄舊載郎官筆江海新乘御史車
若值故人憑寄語金陵詩思近何如

和危山臞寄弟

天子開朝策治安近臣每入漏初殘
香飄紫殿迴金爵
仗下彤庭度玉鸞御苑縱田春正樂
邊城吹角夜猶酸
腐儒未省經邦計直道休歌行路難

畫戟連雲甲第高內官如雨送春醪
貢金半鑄分封印
賜錦多裁侍宴袍自古聖明非獨治
至今材武係相遭
文章且共安徽命廊廟由來錄舊勞

故園兄弟總相思久客懷歸屢失期
司馬卻慚題檄早
東方翻恨上書遲都門樹暗愁中見
鄉國花繁別後知
昨日南橋訪春水望雲回首獨多時

天涯骨肉久離居京國風塵鬢欲疏
娛日強傾開歲酒
憶家頻看隔年書路通一水花開裏
門掩千峰木秀初

便擬邀君此時發歸舟同食楚江魚

送梁實翁免權鐵歸鄉

幾年權鐵困吾州鄉井供輸日夜愁廢治月明誰鼓鑄
空村民散更誅求豈聞免腎成干莫虛擬龍光在斗牛
此日罷征君倍喜楚江春色滿歸舟

壽王左丞

南極諸星映赤霄東風二月滿青條焚香鳳閣春開宴
鳴玉龍墀午散朝但使經綸齊稷契不勞服食慕松喬
日長自度昇平曲閑聽雲閒合九韶

野航亭

孤亭聞道小如舟來客閒能學棹謳常疑竹裏通歸槳

只擬花閒弄釣鉤，月明入剡寧論夜。風起思吳不待秋，
城市誰知有江海。煙波祇在屋東頭。

送盧茂實之廣東憲幕

仙城近接眾山迴，憲府遙臨百粵開。海上喜通持節使，
幕中兼得濟時材。蛟宮織罷魚龍出，蜃戶珠還蚌蛤來。
預想到官多暇日，清詩題徧嶺頭梅。

京國相逢念客遊，微官初試嶺南州。越裳白雉親曾識，
句漏丹砂豈願求。荒徑久連元亮宅，故山猶隔仲宣樓。
瓜期況在經年後，未得相從狎海鷗。

城東遇雨

四月鑿輿出鳳城，此時遊子動歸程。蓬萊一水通雲氣，

閭闔千門度雨聲
書卷喜從船尾載
酒杯愁就馬頭傾
長年三老歡相語
沙際河流一夜生

送張尙德改除雩都萃頭巡檢

儒官乘障氣飄飄
章貢南邊路不遙
縱使人煙連百粵
也勝風俗混三苗
春遊近市杯隨手
夜邏前山箭在腰
直以詩書化強禦
不勞銅柱入雲標

寄王君實張孟功趙子期

左司衡鑑冠時流
憶昨相逢早見收
去國初還漢使節
辭君又汎越人舟
詩因海燕猶須寄
書換池鵝或可求
不有文章誇異俗
天涯何以慰羈愁

吏部先爲畫省郎
獨憐驅馬向殊方
越裳萬里來中國

楚客三年憶故鄉
度嶺敢辭南海熱
遡江終倚北風長
清詩誦罷頻回首
愁絕都門柳萬行

兵部風標映海霞
只今人物數才華
六書盡學周王鼓
重譯親通漢使槎
每喜名公能薦士
最憐遊子獨思家
詩成定覓何人寄
日日江頭訪雁沙

寄李仲倫孫伯剛兼呈張吏部

微官萬里向南溟
卻望京華樹色青
最憶故人能作賦
只憐多士廢明經
孫陽遂使知名馬
李白虛傳是列星
東道喜逢賢吏部
豈無餘力致青冥

寄王叔善兼呈子山內相

爲客長歌行路難
得君眞使旅愁寬
也知文氣來西漢

敢以詩名敵建安秋榻每當明月下春山閑就亂雲看
只今清興誰能共縱有朱弦不肯彈

學士高標今罕儔主人與客俱風流花連紫閣天文動
樹隔青宮月影稠長楊獻賦仍須薦曲几行書不待求
楚客南歸共相憶繫船時復倚江樓

寄陳維禎兼呈揭公公許爲故妻作傳

官樹青青隔帝閭維舟北望每銷魂風來獨使占雲氣
雨罷頻勞測水痕下榻往時同假館哦詩清夜憶過門
君家太史今司馬著述時應教外孫

太史臨文筆最精一間往事獨傷情每憐對鏡窺鸞舞
猶怪吹簫逐鳳鳴列女未終劉向傳故妻虛瘞柳州銘

書成定寄湘江浦預擬招魂學楚聲

澠州示同舟

來時岐路滿沙邊回首何堪問歲年
槎上獨吟猶是客坐中同載或疑仙
風鷗亂起還依草雨燕卑飛卻避船
舊見垂楊已如此往來能使幾人憐

眉山圖

眉山自古聞天下此日逢君出畫圖
空翠忽浮雲氣合江流遠浸月輪孤
猶疑參井通秦塞始信岷峨限蜀都
見說直西多鳥道懶從開國問魚鳧

送王檢校止善

前海道巡檢

海上三年幕府開日邊萬里薦書來
卻承雨露歸南省

還接星辰繞上台負弩應憐縣令至懷章莫使郡人猜
京華昨日同時發慚媿扁舟獨後迴
江左名藩天下雄吳中貢賦與閩通轉輸舊倚蕭丞相
檢校新煩魏侍中畫省芙蓉深映雨碧湖楊柳近含風
於今幕府多名勝閒暇登臨定得同

贈黃仕任地理

蚤歲爲儒頗恨疏中年游藝獨何如謝公自製登山屐
郭氏親留相地書丹壑夜營仙客葬青谿晨訪野人居
他時期子千峰下爲卜雲林更結廬

題阮謙仲客子光陰集遊吳小橐後

江上經年別故林天涯何物寫鄉心長亭蒼莽含朝暮

岐路崢嶸對古今行世共憐車轍滿憂時恆恐鬢毛侵
嗣宗文采諸孫在亦有幽懷託苦吟

江左傳君處處過六朝文物近如何齊梁祖述風流盡
吳越登臨感慨多雨暗海門秋對酒天晴江浦夜聞歌
此行賸喜添詩興莫向流年歎逝波

題山谷蕭峽詩後

爲阮謙仲所得

太史遺風不可尋祇饒遺墨重千金雲煙慘澹連蕭峽
風雨蒼茫入阮林時翫每淹孤客坐買藏終見兩賢心
向來豪奪今何在撫卷長歌百感深

題羅士哲畫送張仲簡謁虞杜二先生

滿幅晴煙寫別離行人江浦放歌時樹深一水通臨汝

花發千峰到武夷問字只攜門外酒尋仙豈看洞中碁
扁舟卻出名山路應得藏書慰所思

方壺

蓬萊員嶠對嵯峨知有羣仙日日過琪樹曉通雲氣溼
羽輪秋會月明多秦人采藥空依海漢使乘槎但入河
誰識高齋有仙島不勞萬里涉風波

圍春亭

暖風遲日布雲林中有華亭結構深窗戶每兼山翠合
衣巾無復市塵侵居人隔隴求花氣遊客巡牆得樹陰
始信桃源渾不遠欲從漁父一相尋

送胡一清北遊

早聞閉戶讀春秋近說辭家賦遠遊懷玉空迷父母國
貢金終入帝王州中天城闕連閭闔東壁圖書近冕旒
自是聖明思至理可無俊彥應旁求

清意齋爲一清賦

高齋間道無塵俗好客惟應數往來幽其白雲秋縹緲
迴同玄鶴夜徘徊水邊坐石時依竹雪後尋谿獨見梅
況有文章每相發也知韋柳最多才

答何好禮

鳳皇城中花若煙客游多是感流年春生江漢思南國
雪盡幽并見北邊遠使豈貧歸有橐微官仍苦坐無氈
相逢未恨今晨別滿把驪珠慰日前

贈相地姚立雪

聞君早得青囊祕藜杖登臨日幾峰花底或尋仙洞出
樹閒時與異人逢只疑東海聞歸鶴莫怪南陽見臥龍
吾郡古稱山水國白雲長伴往來蹤

送何時春北上

何郎早賦遠遊篇慷慨題詩向別筵自古衣冠多愛士
只今臺閣況求賢秦吳道路元通楚趙魏人材總入燕
好向明時致勲業莫將風雨負華年

送何時學游湖南北

潞陽極浦遠帆多憶昨狂遊是處過今日送君如夢寐
少年爲客莫蹉跎沅湘日落明秋葉江漢風迴亂夕波

若過楚纍憑借問沙頭芳草近如何

送朱道夫潯州伏化巡檢

鬱林文學負才華
刀筆三年滯海涯
乘障復趨丹徼遠
問途應傍碧虛斜
山中綠酒開浮螳
石上雕弓照畫蛇
南望桂枝相憶苦
使來先許寄長沙

伏化官居倚竹棚
此邦幽絕少炎蒸
洞穿白石通句漏
江汎清潯轉猛陵
揮翰有時風在竹
罷琴中夜月侵藤
遙知盜賊今全息
獨使才情得見稱

去年京國欲離羣
前日瀟湘喜見君
邊吏只今多用武
世儒何事獨能文
湘南作客過春草
嶺表思親隔暮雲
莫怪書生佩弓矢
起家猶憶漢將軍

西江石梁

西江斷橋不可渡好事架石橫清冷遂疑雲海通三島
無復天河限兩星夜涉不愁風滿瀨曉行還愛月浮汀
遙知谿客多幽興炎夏頻來倚畫屏

西江波浪日沄沄驅石成橋事出羣常憐烏鵲空依月
只怪蛟龍未得雲中流屋影晴先見別浦灘聲夜轉聞
知有使車當過此蜀中司馬最能文

送蒙稅使

江東人爲新淦務使

聞君監稅獨多年行旅皆稱使者賢江嶺近通南海貨
市門深聚北風船金陵曉雨歸帆外玉筍晴雲祖帳前
若到京華論國計莫令官府重緡錢

劉漢中張天彝邀飲

二子才情自不羣
座中賓客總能文
酒壺爛漫傾春露
歌扇留連駐暮雲
湘樹別時春冉冉
江蘼歸後綠紛紛
閉門此日偏相憶
風雨蕭條不共聞

同孔學敏遊仙遊觀

鳳音亭下草如薰
誰見仙娥倚翠裙
環珮忽疑遊處得
笙簫猶想去時聞
湘江竹暗連春雨
衡岳花開隔暮雲
千古遊人自來往
登高回首思紛紛

桓仙宅前江水盈
鳳皇山下野禽鳴
猶聞采藥辭空谷
無復焚香禮上清
雲裏並遊金節冷
月中同載羽輪輕
登臨盡日多惆悵
欲倚鸞簫和楚聲

題裴思敬別業

宦游江國久爲家況有田園楚水涯直爲思親勞夢寐
不堪行役向風沙故池引徑元依竹春院開門總映花
盡道此中多野趣肯因微祿負年華

送嚴允恭北上

嚴氏風流著汗青看君年少復明經上書自擬干天子
垂釣誰能問客星燕薊北回天漠漠瀟湘南下雨冥冥
遠遊直爲明時出自古賢良重漢廷

送薛仲方歸涿省墓

淮海飄零憶范陽南來蹤跡轉蒼茫幽燕日落悲長道
江漢春深夢故鄉家在惟供一灑淚書來祇使九回腸

明年何處求先冢北望松楸滿路旁

漢江銜山圖

西來一水浮襄漢上有羣峰截杳冥層構迴臨沙渚白
亂帆斜映石林青地雄縹緲連嶓冢天險微茫帶洞庭
咫尺風煙應萬里無因一上峴山亭

寄許參政

相第巍巍畫省東布衣時許往來通忽聞冠蓋辭三殿
猶有文章在兩宮故園撫樹思陶令別墅看花憶謝公
楚客南遊最相憶扁舟前月到湘中

題壽寧觀

壽寧林壑抱清虛上有羣仙舊隱居花裏晝愁雲失洞

竹根晴愛水鳴渠山人自著毛君傳弟子親傳柱史書
遊客暫來還徑去未能真與世情疏

題書船入蜀圖送黃尙質赴夔州蒙古教授

楚客之官汎蜀船畫圖盈尺見山川九江樹色瀟湘外
三峽猿聲灩澦前方譯漸通巴俗語國書新絕漢人傳
豈無好事能攜酒問字時時集講筵

送平樂尹宋彥禮

湖南大府收羣彥嶺表名區得令才邊吏賦田疲戰伐
古人爲邑慎懷徠昭潭樹傍鳴禽合仙嶺花臨倚棹開
此去風煙隔湘浦知君時憶定王臺

送蔣廷良歸省因簡袁潮陽

送客湘江見白蘋登高懷遠況思親斗牛紫氣臨三楚
吳越青山到七閩南下恰逢香稻熟東遊仍憶荔枝新
扁舟定過袁宏渚煩寄殷勤問故人

送趙璋甫

名家之駒不易得昔人傳業子如何花飛南岳客遊遠
木落西江鄉思多太息長憐漢傅策獨醒誰和楚纍歌
歸舟豈愛鱸魚美應恐秋山長薜蘿

寄盧經歷

去年闕下送君時御柳千條拂馬垂楚客南來應有賦
漢臣北望每能詩月生庾嶺思梅樹霜薄交州見荔枝
溟海迢迢苦相憶培風猶倚故人知

送姚子徵

雙闕除書下玉階三湘回棹拂珠厓天垂銅柱南低海
地入金陵北近淮江國雁來秋肅肅驛樓雞動曉啾啾
大家定有東征賦鮭菜隨船慰老懷

野人憶別寸心傾臺憲頻聞被寵榮湖外樹圍烏府立
嶺頭花共繡衣行平原未得收毛遂北海親勞薦禰衡
慚媿駑駘後騏驥西風回首獨長鳴

宜江歲晏柬余太守樊別駕

梁楚煙塵日未寧故園迢遞感流萍北風歲暮聞烏鵲
南浦天寒見鵲鴿遊子未歸心轉切故人相愛眼終青
羈棲自喜依仙館不爲籠鵝寫道經

宜江元日

北望天門拜冕旒
宜江晴色滿雲浮
故人作郡分銅虎
新歲行春見土牛
花外樂催銀甕出
宴餘香逐綵旗收
喜聞近日平諸寇
坐使今晨散百憂

和余太守對雪見懷

江雪寒連驛樹遙
鶴裘清坐聽蕭蕭
中天月避光芒出
南國雲含瘴癘消
因憶玉田春種石
乍疑銀漢夕通橋
使君辛苦迎驄馬
也念幽居寄閭寥

聞道停舟傍水宮
登高懷遠賦能工
野寒鷹隼回西日
沙晚鳧鷖聚北風
留客每勞分祿米
憶家時擬問歸篷
陽春欲和休論寡
且共長歌答歲豐

送元景說赴茶陵學正

一官分教古雲陽十月攜家過武昌
楓下繫舟晴望岳竹閒聞瑟暝浮湘
炎陵日落思前帝漢廣風悲感故王
覓說此州多士族看君瓊樹映琳琅

憶在京華跨蹇驢每憐窮巷致回車
嗣宗曠達元耽酒曼倩恢諧早上書
萬里盡瞻黃鶴舉三年空倚臥龍居
今晨振鐸仍南去預擬歸來會石渠

題李子億梅屋

聞君繞屋梅花好絕似孤山處士居
雪裏夜疑香隔隴月中晴愛影當書
洛陽富貴傷華閱江國風流憶故廬
昨日宜谿芳樹底相逢春思獨何如

送鄧仁康赴龍泉延慶巡檢

一官萬里司求盜南浦扁舟日夜東歲暮荆揚江盡落
時平甌越路全通龍文遠棄泉中劍蛇影高懸壁上弓
但使一鄉稱善俗斷無豪客嘯秋風

武功頻起漢將軍儒術徒淹鄭廣文也爲奉親須薄祿
便堪乘障累微勳同舟夜夢巴陵月行李秋瞻雁蕩雲
來歲嶺南逢驛使松州消息許相聞

別孔學禮

感君相愛復相親豈有文章解過人書法未通吳郡草
詩名虛擬杜陵貧晴遊別谷留兼日夜宿幽齋語達晨
別後湘江見回雁帛書無惜寄來頻

送劉子謙赴廣西帥幕

河南相倚最相知，惆悵征帆欲去時。
感事每持清論在，憐才猶與故人期。
邊城雨過低榕葉，幕府春來長桂枝。
舍弟南游借披拂，書回應得慰離思。

劉煥章山居圖

司空山前處士居，白雲千頃映田廬。
桃花近隔秦人洞，松樹深回漢使車。
澗底綠觴浮出酒，牀頭青簡著殘書。
畫圖昨日看芳草，因憶春畦久未鋤。

別劉煥宗

長沙城中夏木清，長沙城外楚江明。
歸人盡日思臨水，過客當時問入京。
空有使槎通外國，每無賓俎置前榮。

相逢又作長途別多謝西山主送迎

答劉雲章

憶昨浮槎傍海回只今幽館向江開馬卿去蜀誇題柱
郭隗居燕媿築臺將詩豈敢逢人誦載酒空勞共客來
況復扁舟雨中別爲君臨發重徘徊

巫峽圖

十二峰前江水東上疑三蜀路相通青天鳥影連巴峽
落日猿聲近楚宮每有客舟來繫樹豈無仙袂去乘風
古來奇絕空傳盡今日何人賦最工

覓白雞

君家白雞異凡種變化恐是西方精食尋丹日過雲影

棲近書窗亂月明山雞映水徒相疾野鶴同林已不驚
許寄雙雙趁書舫竹棚先稱雪花輕

寄方君恕

聞君臥疾近如何閉戶時應賦短歌安石或能攜妓出
子猷常擬櫂船過微風倚檻宜修竹落日臨池愛綠荷
也念湖邊未歸客秋山回首白雲多

送張秀才北上時將赴海

身逐征帆赴海涯道逢行李問京華涓人解致燕王馬
卜史工占蜀客槎冠蓋早朝星在樹管絃春宴月當花
盛時繁麗應如昨把酒聞鶯肯憶家

夏仁仲蘭坡精舍

君家別築蘭坡上好，事能來共讀書。九畹入雲秋色迥，
八窗通月夜光虛。唯須殺竹傳科斗，不待收芸辟蠹魚。
聞說四方來已眾，買材更擬廣樓居。

岳陽中秋值安南貢使因懷舊遊

洞庭秋氣滿龍堆，爲客偏驚節序催。鐵笛乍聞雲外過，
瓊樓應傍月中開。越裳重譯三年至，溟海浮槎八月來。
忽憶舊遊今萬里，天涯長見雁飛回。

送葉天惠

岳陽學舍古城陰，歲晏憐君賦子衿。傳業豈憂名未立，
愛親恆畏老相侵。天門挂月烏嘯冷，夢澤連雲雁去深。
憶我舊遊如昨日，逢人離別損鄉心。

歸舟阻風

洞庭十日風勢號沙頭客舟如繫匏沅湘九道白波立
衡岳千峰立霧交神龍欲蟄無定窟黃鶴將歸愁故巢
咫尺城樓不得上何因一望楚江郊

潘彥賓雙劍圖

延平津頭兩神物自是豐城金鐵精一朝變化風雨合
八極轟騰煙霧生黑蟠海氣通無底白射虹光簸大明
巖穴誰能識霖雨形求先已慰羣情

余嘉賓伴送南使因過家岳陽有詩寄餞和答
越裳貢使出皇州送節南來滿路秋乘傳過客須倍喜
落旄歸國莫深愁南宮雨露通先館東壁星辰接御樓

也念故人炎海去都門何日卻相求

王氏相師山莊

相師之山雲杳冥千崖萬壑倚空青上方雷雨藏天井
南極風煙落洞庭谿客去迷花藹藹野人居愛竹泠泠
何時遂買登山屐乘興還來叩石扃

王子高標玉樹秋是中泉石稱風流勝同輞口居摩詰
清似山陰過子猷一壑風煙臨載酒百年才思接登樓
田園日涉今成趣還憶前人感釣游

茆堂聞在斷崖居耕鑿眞疑與世疏黃石洞依秋樹冷
子房祠映古苔虛山人自述潛夫論部使空求處士廬
見說田閒多野興每慙爲客負犁鋤

雪中舟過武昌寄黎別駕

日南老子擅文章自昔來朝住漢陽
二頃賜田家僅給百年歸國路空長
藏書每欲存科斗吹管猶能學鳳皇
近日還聞厭城市題詩多在水西莊

八十之翁恆苦吟一懷故國一傷心
干兵入越年猶少九譯朝周歲已深
汗竹功成青史後結茆興聚白雲陰
江頭歸客勞相憶雪夜扁舟何處尋

答何大成

別來短髮不勝搔千里還家一敝袍
開徑自驚春竹冷過門猶記古松高
雲中得雁通書疏雨裏籠鵝致酒醪
寂寞腐儒村舍晚煩君文字數相褒

送月明德經歷赴工部主事

明德名月忽難工篆在臨江有聲譽

清江地狹仍凋弊上府文繁費剗裁忽報郎官天上召
遂煩使者日邊來考工夙已明周禮利用猶疑致楚材
總有去思情萬疊數占雲氣望蓬萊

明公爲政已多聞久客還家喜識君始信明珠能破濁
也知良驥蚤空羣分明漢策存經術零落秦書見籀文
此去扁舟各南北天涯相憶萬重雲

儉府才華奪上賓各官僚屬近清塵月寒烏鵲愁依樹
日落狐狸喜瞰人鄉校久歌公在泮輿梁今見客知津
獨令文字存遺愛此日誰能借寇恂

贈陳與之

處士窮居已白頭春來思泛五湖舟不逢太守知徐孺
空使時人惜鄧攸一代衣冠餘老大百年文物見風流
承家獨恃諸孫好奉杖相從慰客愁

贈壽上人之五臺約歸同虞學士遊匡廬

飛錫初聞度嶺頭看山復作五臺遊天花雜還來獅座
海樹微茫滅蜃樓卽可是中依上首更於何處覓同流
頗聞李白匡廬下遲子歸來共汎舟

贈黃仲宣

君家城南當市喧昔者讀書恆閉門三年作吏淹下邑
一日辭親違故園塵裏驪駒久困辱雲閒黃鵠卽蜚翻
業成願子勿留滯堂上春來思樹藪

送孔伯吾拜祖林

三孔風流譜牒存
祖林迢遞隔中原
家全科斗經秦世
路遂爰居過魯門
闕里蒼蒼雲樹合
闕宮寂寂雨苔昏
始知聖德同天地
長使恩波及子孫

和楊友直度嶺韻

使君三月嶺南還
五馬翩翩曉度關
郡邑去思多下淚
道途安穩一開顏
粵音勸酒通殊俗
漢隸題詩徧近山
聖主求賢念耆舊
正園那得便投閒

高明樓

江上孤城映水回
市中層構出塵開
衡廬樹入青天盡
章貢波翻白日來
每憶陳登門有客
最傳王粲賦多才

闌千百尺應能借乘興誰同月下杯

送純德中

翩翩杖錫響空飛五月松風滿翠微禪悟已將詩並入
道孤元與俗相違匡廬迤邐盤秋霧禹穴蒼茫散夕暉
此外名山何日徧優曇花發及時歸

題胡伯有官谿山閣

湖上羣山浮翠陰山阿高閣湧清潄天虛彭蠡風帆盡
地下鍾陵霧雨深文字數從名士得壺觴頻約故人臨
卻憐城府無仙分咫尺谿源不可尋

贈侯務本

異人墨訣世稀聞病起論方喜見君卽貢尙方知不媿

偶來蕭寺許同分，匱開玄豹春含霧。
圖戲驪龍晝起雲，從此臨池增筆勢。
書成祇恐費鵝羣。

洪都再贈

憶昨相過愜素聞，鍾陵五月更逢君。
題詩豈敢傳千里，學字空能愛八分。
樹裏叩門衣帶雨，竹間試墨硯生雲。
送行忽起青冥思，黃鵠高飛自不羣。

送楊仲剛之藤州學正

蒼梧之南多樹林，石州巒舍鬱蕭森。
紫藤影落書帷靜，青桂香依禮殿深。
殊俗干戈恆滿眼，古人庠序最關心。
儻逢舍弟煩相語，日望鄉書抵萬金。

題陳可立所藏邵菴書畫後

丹青不見王中允歌賦常懷杜拾遺一代風流傳妙墨
百年勝絕寄清詞驪珠出海人能得白璧連城世鮮知
從此華峰多寶氣斗南中夜起相思

美陳國寶州判新修高風書院

聖賢祠宇高峰下風雨漂搖感慨多興學遂煩新柱石
來游不使廢弦歌旂臨碧水晴雲動碑映蒼山夕照過
遺愛百年何所係諸生朝夕誦菁莪

羅濟川百雁圖

天南鴻雁百爲羣澤國微茫島嶼分飛逐稻梁時共集
宿驚蒲葦近相聞瀟湘夜渡霜浮月渤海春還水映雲
坐數修程感行客揮弦送目思紛紛

答張德暉

昔年爲客上燕臺身負虛名媿不才處士有星今始識
故人如雨日同來應憐薄宦趨南海豈有雄文動上台
欲答新吟正惆悵渴心先近嶺頭梅

送普上人遊浙東柯學士

寒山寺前江氣深吳王池苑正蕭森楓根繫艇秋重到
竹裏懸鐙夜獨吟禪客往還無定跡古人興廢不關心
將詩爲訪柯供奉想見揮毫風滿林

答張仲讎

君家華萼映階除紅頰修髯畫不如樹下酒香留客醉
竹閒詩就遣兒書高飛每喜瞻黃鵠遠別親勞賦白駒

海上他年卻歸日維舟還覓故人居

送性道原遊方

九江東去盡滄溟無數名山擁地靈
金屐春遊雲滿谷木杯夜渡月浮汀
有時鶴下愁衝錫何處龍來喜聽經
蹋遍諸方應得道故鄉煙樹正青青

周尙志同歸寓所適寺門已閉會宿張伯龍宅
清秋爲客依僧寺落日逢君過客窗
並座總看人似玉臨觴翻畏酒如江
曲終別院歸銀燭鐘罷迴廊閉石幢
已去卻還仍不惡論詩未覺寸心降

和韻送虎恕齋侍父降香玉笏

蕭水東南翠作堆洞天飛路隔崔嵬
晴林守虎花含霧

陰壑行龍樹起雷使者旌幢天上至仙人環佩月中迴
隨車況有雙珠在靈雨霏霏濯暮埃

王顏復丹墨

妙墨早傳烏玉玦洪鑪更伏紫金丹研磨盡日資文字
服食何時致羽翰雲中雞犬飛皆去鐙下蟲魚注未乾
此訣定從方士得異書寧遣俗人看

題渝南黃敬道耕鋤所

州橋南畔足田廬應避囂塵遠卜居傍舍水泉通釜錡
隔林煙火映犁鋤行人午值田中飯過使春停樹下車
見說全家修隱服白頭賓敬晚如初

贈陳東溟

善相地理星命

傳言
聞子奇胸貯海濤逢人水鏡察秋毫浮槎夜歷飛星近
扶木朝迎出日高預知仙豕來孤鶴親見神山戴六鰲
河伯向來空自負擬垂鵬翼共遊遨

送胡漢傑北上

我昔尙幼君壯年下筆看君詞涌泉離羣每獨吟招隱
懷舊何因訪草玄長卿志大新還蜀樂毅才多晚入燕
北遇貴游如見問煩君爲出贈行篇

寄別林允恭兼簡其子鍾英

爲客常年去里閭歸來蹤跡到城疏期人每恨違雞黍
憶弟頻勞致雁書逐祿今晨瀕海去卜鄰何日對門居
知君膝下斑衣好看竹焚香意自如

赴廣經九牛驛次文居安韻

自憐薄宦尙南遊共載人疑李郭舟傳舍風煙停驛馬
使槎河漢犯牽牛雨篷對語恆連夜霜角同聽況值秋
海上到時應歲暮知心獨倚慰離愁

奉陳怡菴憲使

故家持憲起儒流遠道觀風控上游采擇舊緣明主識
操存須與古人侔西江紫氣收龍劍南海清霜薄蜃樓
從此殊方無反側坐令重譯頌咨諏

奉使南行載璽書小儒從役謾崎嶇解裝不顧千金橐
題柱祇慚駟馬車此日微官猶蹭蹬蚤年獨學況蕭疏
自今泮水親時雨會激長江起涸魚

次韻劉侍中春懷

天涯懷抱非春事海上晴光忽暖風
萬里厭隨游宦遠一樽喜得故人同
樹陰展席閒揮塵松外停車遠避驄
想得故園寒食近榆煙花霧近濛濛

武昌送友人入蜀訪故

黃鶴樓南水接天送君西遡錦江船
風高馬閣蒼霞亂日澹龍門白雨懸
慷慨欲題司馬柱辛勤應預子雲玄
故人置榻遙相遲明夜春山隔杜鵑

題棲碧山爲淦龔舜咨賦

揭文安公云子欲賦棲碧久矣興無由起一
日臨江傅與礪來開卷同賦之子詩未成與

礪已就非不可更作念無可以過與礪也遂
易結語而已

山人愛山如李白幽棲還在碧雲深松杉繞屋清宵響
雷雨懸崖白晝陰石上每同仙客坐花閒猶恐世人尋
東華日日多塵土終擬投簪話夙心

贈劉天子

每聞章貢多奇術不獨楊曾得異書龍憶葬時天子至
鶴疑仙後世人疏幾家華屋成高塚千載青山照倚閭
此日因君聊借問劉郎荷鍤意何如

傳與礪詩集卷之六

傅與礪詩集卷之七

五言長律

壽陳景讓都事四十韻 八月十八日

種德由來遠流芳信有苗名門多令器夫子最高標地
迴瞻崧嶽天清見斗杓聲名從結髮問學自垂髫江漢
棲遲久林亭興致饒紫蘭敷月露蒼竹倚風颿畫艇移
書放秋鐙把劍挑微名寧屑屑高志獨囂囂五氣乘昌
運羣英集聖朝武功收赫怒文治付宣昭麻數初歌禹
聰明已贊堯求賢常晏食夢帝起中宵石室仍高隱金
臺歛見招賜書懸日月乘傳出雲霄議論紆三顧榮光
動百僚入宮催護璽趨府聽鳴鑣郊社陳周禮神人協

舜韶出關春衣繡分陝夜乘輅獬觸心彌壯豺吞膽共
銷封章猶懇切歸思遠飄飄袞職江湖隔鋒車道路遙
凝旒思穆穆行李發蕭蕭典祀尊原廟承釐洽大寥步
依文石進香近黼裳飄白日明驄馬清霜急阜鵬帝裾
遮道引諫草避人燒佐省持三尺繩民究八條兵曹多
暇豫郎位益崇超所向才華冠何曾意氣驕臺評推妙
畫士望慰深翹引拔連茅茹芬芳襍桂椒銀章看且佩
金鼎竟須調小草方慚出浮萍久恨漂文章殊豹隱篆
刻近蟲雕徐穉矜懸榻蘇秦惜傲貂敢期充砥礪猶幸
致芻蕘黃鵠追高舉青松託後凋火行占孟月星聚識
生朝壽酒開雲液仙音出鳳簫祇應成遠業未可慕松

喬

送孔惟中再謁祖林

吾郡稱文物君家續聖賢
尼山懸日月楚樹隔雲煙
追遠逢昭代遊方及盛年
北通三仲譜南下九江船
雁起垂綸外鷗飛解纜前
水涼聞雨坐沙暝望星眠
岱嶽遙臨海河流遠自天路
詢洙泗境人指鄆謹田日觀朝暉
接風雩暮色連闕宮俱寂寂
闕里獨絲絲翠合知林墓
翬飛識廟堧趨庭槐氣潤拜下柏
陰圓科斗殘書帙旋蟲壤樂懸圖
稽始祖出世別小宗傳遠近論昭穆
尊卑齒後先杖裁楷木淨冠截檜皮
堅舊俗聞詩禮遺儀見豆籩玉傾
當別洒珠寫贈行篇古道嗟環轍
長途勸著

鞭京師同逆旅瀛海限飛仙賦或君王問貧應故舊憐
苦唵冰合硯危坐雪侵氈魚日從人貴蛾眉祇自妍猶
懷辟氏劍未絕伯牙絃卒業思歸魯離羣遽發燕霜蹠
終奮迅風翼暫迴旋文憶來時把詩要去日聯綠蕪羈
思滿青柳別愁牽爲客慙烏鳥因君感杜鵑充城多驛
使頻寄彩雲箋

送彭叔璵歸臨川卻之尼山山長

毓聖由天縱鍾祥紀地靈文開周宇宙神照魯郊坰泗
水煙中白尼山日下青古祠留草創遺躅接音形緜葦
來諸子營蕭享二丁祭田侵後廢植木亂中零嗣續仍
詩禮衣冠足典刑麒麟思繫紱科斗慨遺經建學謀官

守推賢慎委令百年興曠典一語動明廷有客真英選
多才更妙齡每看鳴匣劍羞對讀書螢北極憑元氣中
台會德星駿收燕市馬甘薦楚江萍紫電纏鱗鬣清霜
整鶴翎久疑淪浩蕩忽作附青冥被檄趨鄒邑從人訪
孔庭高堂須覲省歸路正伶仃里父窺蘿徑家人候竹
扃壺觴春灑灑鐙火曙熒熒還舍雖云樂之官不可停
雲高瞻泰嶽雪盡見滄溟驥服長驅阪牛刀始發硯宮
牆上日建弦誦坐時聽歲月登倉庾春秋具鼎錮市通
槐下道壇築杏陰亭銀漢侵題榜丹青映勒銘育材須
杞梓醫國備參苓木鐸流聲教案盛著德馨乾坤吾道
在常使萬邦寧

寄題番陽周子震金潭山居

大氣生旁薄立功接杳冥江開吳楚白山直斗牛青玉
牒呈天祕金潭泄地靈百盤工取勢千疊互殊形石吐
高低筍峰羅大小屏忽如森隊仗復似倚娉婷六六移
諸洞三三映列星靜宜營道室幽或下仙駟客有依文
物兒皆尙典刑卜藏思買宅佩訓謹趨庭娛老心能遠
登高步每停艱難成宿志窵窵慰千齡雨潦供漂木神
祇助薦牲史留徐穉傳碑勒蔡邕銘碧水通銀漢蒼霞
護石扃暝迷中谷路晴見隔谿亭鳳穴含飛旭龍湫蓄
震霆倚廬浮晻靄行徑俯清泠鸞鶴軒羣岫龜蛇汎遠
汀陰陽相抱負存沒總安寧種竹期成實栽松擬伏苓

久居鄰吠息清誦野猿聽夜燭吹藜杖朝饗啜土劍馬
卿能作賦韋氏舊傳經伯仲翔鷓鴣東西念鶴鴿辟雍
初識面京國共漂萍磊落珠藏斗光芒刃發礪卽看培
遠業誰得限脩翎何日過彭蠡從君載醪酈遂求靈運
屐一往眺林垆

送孔學文之湘鄉州判

郡邑頻騷動朝廷失撫綏君繇先聖出政學古人爲北
極迴旋裏東門祖餞時家從天上挈官自日邊移雪樹
違燕市風帆掠楚祠大江開浩蕩靈岳見參差候吏迎
皆喜州人到恐遲苔虛蔣琬宅竹淨褚公池閒暇應攜
酒登臨得賦詩此邦稱富庶今代益蕃滋地氣湘潭會

天文翼軫垂山川曾屢涉風土向來知秔稻金纏穗松
杉翠壓枝魚肥春雨窟牛滿夕陽陂禹貢連三澨虞巡
接九疑至仁終遠被淳俗未全漓豹隱多文采鴻飛足
羽儀五兵閒警邏千畝樂耘耔聽訟寧求異觀風政在
茲治成聽舉最萬里慰懷思

送陳道之獻書南歸

天子尊圖史朝臣念布韋著書心力苦爲客鬢毛稀雷
雨羣龍會雲霄一鶚飛文風吾郡最經術古人微夫子
辭家塾前年入帝畿塵埃白羽扇鎧火絳紗幃訓傳多
修補文章併發揮揚雄終得薦劉表暫相依歲月功何
晚乾坤事每違買臣今日貴伯玉幾年非畫省俄傳檄

青山遂拂衣嗟予同邑里奉使隔庭闈路出將軍柱河
經織女機艱難成國典安穩恃皇威燕薊繁霜雪衡廬
老蘄薇那知萬里道能及一時歸南海連春霧西江繞
夕暉他時兩相憶何處采芳菲

送幻上人還高麗

梵宇通遼海僧居屬弁韓象依三藏立龍近眾香蟠異
域今爲一遊方故不難繡幢來日下金刹滿雲端世主
多尊佛沙門總授官衣傳中土徧錫挂上方寒網樹珠
垂絡香株寶刻闌况茲窮壯麗知爾久盤桓故國春頻
至長途雪又殘風沙歸寺遠歲月作程寬日落經華表
天窮得翠巒水杯過渡穩蓮座出波乾暮雨鳴齋鼓春

風倚釣竿誦經泉客聽傳鉢海神看行住都如幻虛空
未足搏路應歸後憶雲向坐時觀紫極迷天樂青霄隔
露盤如逢國王問爲說聖人安

送蘇伯脩侍郎分部扈蹕

扈聖千官出分曹六職俱侍郎精古學議禮應時須車
蓋連諸郡衣冠接兩都句陳嚴內拱屏翳肅前驅灤水
開宮殿龍門起畫圖仗依雲氣肅人望日華趨馬酒來
官道駝羹出御廚露凝金作掌冰想玉爲壺地絕分寒
燠天清習曉晡會朝常只尺奏對祇須臾舊俗懷周雅
今賢誦禹謨愛君期得道憂國況爲儒久客嗟牢落諸
公念樸愚路經南粵險心戴北辰孤汲引勞修綆吹噓

倚大鑪臨風思何限相送獨勤渠

送胡繼叟赴道州知事

天子綏荒服郎官映列星銓曹嚴遴選幙府待儀刑迢
遞蒼梧郡微茫有庠亭西京秋始動金掌露先零去路
緣湘竹歸船傍楚萍道詢虞舜治江弔屈原醒丹極元
非遠蒼生久未寧忘投傷器鼠思去食心螟五嶺當羣
盜千山震百靈日光兵後白雲氣瘴餘青憶昨過洛水
尋君隔洞庭北來還解后南望正矜屨網罟今逾密干
戈歲未停浩歌懷古昔遠別戀朝廷久客緣三釜時人
笑一經看君萬里翻從此薄青冥

送張尙德之銅山巡檢

尙德名仁偉渝人庚申鄉貢

作言一
紫氣開霜匣青雲倚玉梯才名淹下第文學借卑棲度
嶺初還北浮湘更向西直求乘小障不作歎朝齋地險
連三峽天迴帶五谿夜郎花外隔盤瓠竹閒迷獨木剝
船小荒茅覆屋低自從歸舞羽應總事耕犁秋嶂沈烽
燧春亭靜鼓鞞弓刀閒暫閣翰墨醉多題玄豹終辭霧
花虬豈戀泥去鄉殊出處行道各攀躋離別腸堪斷留
連手重攜上林頻候雁中夜共聞雞歸路何由並生涯
苦未齊千峰獨南去心折鷓鴣嘯

登南岳次黃次舉韻

楚望尊衡岳虞巡比岱宗朝廷隆正祀神物闕幽蹤宮
殿迴朱鳥幡幢下赤龍玉書何代冊金奏古時鐘雷雨

中天近煙雲盡日重歲穰資長養時治僣登封行役心
能遠幽尋興頗濃巖棲多映竹山徑稍侵松地軸通三
島天梯挂五峰危藤猿共慄懸瀑雁相衝羽客嗟長往
颿車不可從自疑流水隔邗與故人逢江漢低鴻鵠乾
坤亂蟻蜂飄零眞寄世蕭索入成冬山戍喧寒柝邊城
起夕烽撫時多感慨臨眺敢從容

送尉彥誠歸長沙卻之道州經歷兼呈外舅孫

公

歸客長沙道之官有庠城府公資幕畫朝士采詩評一
郡優爲理千山遠作程去瞻南岳雁行背上林鶯野店
逢花發江帆及水生過齊鄉吏識入楚路人迎問字從

兒好收書任僕爭淥醪春酌暖瑤瑟夜聞清禹鑿遺天
險虞巡畀月明感時雙鬢改懷古寸心驚盜賊連饑饉
科徭半甲兵實憐民未息深倚政能平儒術寧迂闊人
材自老成湘中見吾舅遺世獨何情

送楊翼之還清江

同郡晚相得還家君獨先艱難萬感集離別眾愁牽盜
賊凶荒後干戈餉餽前故園思縮地行路歎登天郡國
方收馬江湖總稅船遂嫌居鬱鬱竟作去翩翩芝嶺寧
忘世桃源似欲仙游鯤輕萬里歸鶴異千年已謝蘇秦
印無論祖逖鞭道瞻匡阜雨山背薊門煙遠色芙蓉浦
濃香穉稷田藏書猶有壁坐客豈無甌我亦懷三釜誰

能乞一錢將詩不敢寄多是斷腸篇

奉送達兼善御史赴河南憲僉十二韻

聖治尊儒術賢才翼帝躬立朝防觸豸行路避乘驄復
道河南去先愁冀北空激揚元自任出處豈謀同地絕
看持節天長惜轉蓬繡衣今日把尺素幾時通別酒花
開裏征帆木落中薊門懸夜月梁苑度秋風古縣藤蘿
碧霜林果蓏紅咨詢行每徧閒暇賦能工白日明高岳
黃河繞故宮登臨興何限題寄北飛鴻

和劉子簡國學冰

凌室晨披霧雝宮夏薦冰水晶持欲滴玉氣望如蒸積
自羣陰漸堅非一夕凝碧涵天左轉紅射日東升貯盃

寒疑漏侵衣薄未勝戰休牀下蟻飛失坐中蠅病肺清
堪滌飢腸冷易乘詩因詞客誦書憶史官稱滹水嗟王
霸陰山惜李陵時平銷甲馬歲足賦金繒二氣須調燮
諸公正業競寄言老成子四序莫相凌

登岳陽樓

馳傳自青天憑高憶往年闌干映水迴埤堦與雲連江
會沅湘大山侵楚蜀偏蜃郎通別井龍女宅重淵日月
鴻濛裏風沙浩蕩前驪珠秋後冷犀火夜深然張樂猶
疑奏乘槎欲並仙登臨停去騎寵餞惜離筵地氣南交
接天文北極懸賦慙王粲作詩擬杜陵傳渺渺衡陽雁
迢迢浪泊鳶早春回漢節應得汎湖船

歸自安南贈中書掾凌仲明

皇帝初登極殊方總入朝
忽逢歌遣使因得佐乘輅
白日臨丹徼清秋滿赤霄
三湘緣沮洳五嶺度嶕嶢
旗對風煙動衣垂瘴霧飄
解裘輕陸賈投筆媿班超
賞典仍叨忝文風正寂寥
玉衡憑氣運金鼎待人調
掾省遭時彥憐才似久要
共成毛義喜竟免介推燒
山雨知玄豹天風仰阜鵬
逢人寫懷抱聊復寄歌謠

題方叔高木齋

種樹千章合開軒四面臨
徑微通窈窕檐迴起蕭森
風雨行春氣雲霄落午陰
碧從脩竹間青任古苔侵
養鶴幽時下垂猿密處吟
都因結構好逾覺往來深
花發明

開卷藤懸拂挂琴閉門惟淨石倚杖卽深林寥闊天涯
夢消搖歲暮心歸舟過彭蠡思爾定相尋

奉和蘇授經八月二十九日明仁殿進講敕賜
酒饌許乘舟太液池趨西苑之作

東壁圖書出西周禮樂修燕閒催進牘清切近垂旒聖
學天俱運恩波海共流萬幾思至理三歎賞嘉猷紫氣
當筵駐青雲滿殿浮賢應通隱滯伎豈進伊優虎觀風
移仗龍池雨送舟詞章唐后恥訓詁漢儒羞明主虛能
受諸公問卽酬六經懸日月何止鑒千秋

聖明思善述耆舊倚交修虎豹開閭闔山龍照冕旒日
臨丹展動雲拂翠華流獻納稽前古都俞協大猷几筵

花氣合圖史竹光浮當亡經綸遠尊賢禮數優內廚深
出饌西苑近迴舟禁鬻由來貴谿毛庶可羞遙勤三顧
問各奉萬年酬牢落南州客相望奈九秋

送余觀嘉賓及第歸岳陽卻赴常寧州判

聖主徵多士郎君最少年絲綸三殿出名姓九賓傳月
桂浮丹籍宮槐拂綵筵鑪煙攜去重袍色賜來鮮雁塔
青雲繞龍門紫霧纏聖謨恭己治文德待人宣日月南
垂楚山河北湊燕洞庭飛鳥外衡岳亂帆前祿喜娛親
足官聽舉最遷京華未歸客臨別意茫然

送無外式上人還高麗

萬國山河混三韓道路通都因聖德遠兼使佛書同持

鉢遊天上乘杯自海中煙沈孤嶼白日湧大波紅入夜
唯瞻斗經時只信風本從箕子國來覓梵王宮到日逢
春草歸程及早鴻將詩猶恨少問法久知空鳴綠遙連
北雞林更在東他年許詢輩何處訪支公

九月六日壽許中書

宇宙生良弼朝廷得鉅儒九秋頻落帽三日記懸弧露
氣流金掌天文繞玉樞人皆瞻稷契世擬見唐虞日月
懸雙闕風雲會兩都治分黃閣坐朝向紫宸趨宿昔聞
周禮從容進禹謨神仙何用學廊廟竟須扶瑞世知龍
馬傳家見鳳雛今晨對佳菊爛醉把茱萸

丙正縣舍

歲月催行役塵埃廢苦吟懷山叢桂遠入縣古槐陰道
倚相如節堂虛子賤琴廚人輸傳食稚子解懸衾風露
占秋早星河識夜深履聲嘶馬燭影動棲禽暗漏時
時鼓寒衣處處砧海邦圖上見江國夢中尋翌日過沼
水何時到象林比來常蚤起王事最關心

送程伯臯還新安

南宋衣冠盡東吳闕闕存風流成異代文雅見諸孫近
日來京國因秋憶故園知交無復在羈旅更堪論舊隱
藏山色清江落水痕坐愁楓樹老歸愛菊花繁任昉餘
幽賞陶潛避俗喧窗風晨下鶴礪月暝嘯猿竹淨臨書
卷松高蔭酒尊雲林真可樂軒冕未爲尊

送廬陵范會宗入京省兄朝宗

大范留京國齋居接棟梁端門通籍晚望苑曳裾長遠
客逢難弟諸公比季方題詩晴望岳載酒夜浮湘萬里
懷燕市三年厭楚鄉旅遊成獨往兄在慰相望馬酒宜
風土狐裘耐雪霜況聞周選舉不廢漢賢良紫電依龍
種青霄屬雁行故人多在北應念獨南翔

送安伯寧知沔陽府

久說貳車賢新聞領郡專披書辭北闕建節指南天水
國春爲市沙邨夜種田雞棲桑雨外魚網荻風前山獻
荆人璞江通郢客船使幡當竹過賓罍隔花傳訟獄平
如水閭閻望若仙政成聽舉最勳業進貂蟬

過小孤山

怪石成孤島長江瀉亂淙人愁造化迹神闕往來蹤落
勢懸千仞盤根下九重浪侵緣岸釣風應隔林鐘陟險
尋幽洞憑高對別峰船依天柱過廟受璽書封厓絕纜
通鳥潭寒欲起龍經過毛髮悚不敢久從容

題朱仁昭別駕所藏幽篁古木圖

黃落催寒色丹青著苦心幽篁依磊砢喬木映蕭森鸞
鳳青霄迴蛟龍白晝陰靜疑風動壁晴畏雪沾襟落日
愁空谷寒天憶故林風煙三徑晚霜露百年深汗簡誰
能任浮槎不易尋他時愛清節對此脫朝簪

詠常寧新鐘東余太守樊別駕

傳言十
牧守新民聽鈞陶協化功采山羣力會趨治百心同紫
氣干南斗玄陰散北風警時成器大傳世勒辭工遠響
號神獸奇文繞怪蟲主司嚴旦夜撞擊破昏聾冰雪懸
天半雷霆隱地中自今聞政最歌頌總無窮

題禪居山雲堂

丈室蟠青嶂千峰起白雲樓臺數步隔鐘梵半空聞衣
潤寒偏覺人來近始分樹陰當黹霽谿影度網緼地迴
藏靈氣天清斷俗氛寸心無著物五色自成文細雨休
春誦微風坐夕曛是中支許輩吟嘯日爲羣

太學上丁

秩秩嚴明祀煌煌闕孔祠橋門多士集齋廡庶官隨禮

樂循周典衣冠雜漢儀
進牲雲覆俎揚燎月當墀
道並乾坤大文從世代宜
恭惟歌聖德詠歎不知疲

竹深亭

華構依林下幽篁接礪阿
夏陰當坐滿秋氣近檐多
脩潔同冰玉蕭條帶薜蘿
映書光可挹侵袂翠相和
山阮時俱築求羊日共過
知君少塵事歲晚得婆娑

七言長律

奉和宋翰林顯夫御溝詩韻

宛宛長波切太虛
霏霏晴霧溼高居
雲涵度影翻玄燕
日映圓紋散白魚
遙轉石陰通樹細
稍侵花底出宮徐
橋邊市起春鳴轂
閣裏朝回晚曳裾
天子數臨窺碧藻

詞臣時敕賦金葉龍池浩蕩恩波接草木無情亦勝予

送鞠希仁

友元

及第歸岳陽卻赴邵陽縣丞兼

寄楊秀才

裕

平陵一別雁來頻京國相逢燕賀新桂殿日浮金榜曙
杏園雲散玉壺春董生對策真能事轅固談詩恥後塵
悄悄聞雞持別袂蕭蕭跋馬送征輪荆衡地闢通南極
幽薊天回倚北辰湖草欲青應進舫縣花初白肯懷人
長卿實畏貧歸蜀季子徒聞早入秦爲報揚雄休識字
少年直恐鬢成銀

登石鼓山

歸途訪古駐征鞍懸棧通幽繞曲闌故老尙傳唐棟宇

諸生猶識魯衣冠
苔封後洞蒼雲溼
樹蔭西谿白日寒
諸葛祠前沙浩浩
昌黎碑下石團團
山浮岫嶺晴時出
江合瀟湘地底盤
也擬題巖記行迹
詩成祇畏萬人看
寄題吳野夫竹松齋

蒼松脩竹繞茆廬
中有幽人事隱居
琥珀入雲閑後
鬪琅玕經雨靜來
書鏡湖冷逼秋聲
早禹穴晴通曉色
虛野客每能攜酒
至鄰人時共帶經
鋤更培老樹看巢
鶴休損長竿學釣
魚霜雪欲闔千畝
外棟梁動計百年
餘子猷興致從人
怪元亮生涯本自
疏南望風煙限林
壑京門久客正踟
躕

送觀至能赴廣西憲司經歷

薊門官柳徧鳴禽馬上離人酒強斟久以才名稱闕下
忽持風采照江潯三湘曉雨開衡岳百越春雲接桂林
何遜到官勞賦詠謝安攜客喜登臨吏人靜往山城僻
部使閑過幕府深谿裏藥苗寒自綠道旁榕樹晚多陰
蠻夷比歲頻騷動巖壑何人更討尋明日孤帆逐君發
長沙南望最傷心

送楊好問

裕北上

京國衣冠集勝流昔年恨子不同遊夔龍禮樂開經濟
班馬文章寄纂脩此日送君須決去諸公薦士足深謀
金門夜奏三千牘玉座春瞻十二旒無復風塵淹白日
也知雲漢倚清秋明年海上還相念應有書來慰別愁

傅與礪詩集卷之七

傅與礪詩集卷之八

五言絕句

古意

人言道路遠直傍天涯去頭上忽見天近於江南路
牽牛一水隔織女經年會咫尺闕相聞何況千山外

雪中訪友人值出飲未歸戲題二小詩

空齋掩深雪知向誰家宴徑造不逢人殘書誦皆遍
期君久不至深坐雪霑扉臨當日暮去終同興盡歸

戲效子夜歌體六首與達兼善御史同賦

種荷深水中日夜期成藕蓮子逐浮萍風波漂蕩久
織錦望成匹終朝不滿尺誰知方寸閒千絲萬絲積

儂是弓上弦雖絕猶當續歡如弦上矢一往遂不復
思將儂別淚溢作長江水處處逢歡船任歡行千里
郎心願成鏡照妾生光彩鑄鐵作同心千年亦不解
歡乘紫騮馬儂作碧蠶絲繫在白玉鞭千里得相隨

古楊花怨

楊花白如雪無事學高飛莫作浮萍草漂零不肯歸

卽事

官家禁弓箭不得行人把猶聞馬上寇殺人青山下

金竹道中書所見

日上清霧開山虛翠煙集紛紛羣木中時見孤松立
巨木爲人伐細木森自蔽作書諭松柏材大何足貴

陵州

遠道千峰隔長河萬折流風帆不可住今夕過陵州

慶都道中小憩

暑路宜官柳風亭厭旅塵伶俜七尺影偏與太陽親
至樂城使者亡其弓戲題

兵革三邊靜蠻夷九譯通猶持漢使節莫問楚人弓

衛州值雨

大澤泥淖多今朝復秋雨不畏道路長惟傷馬行苦

題衡陽驛

南來山不盡北望意何如恨殺衡陽雁來時不帶書

題襍畫

虛舟不得渡立馬垂楊側但見從橋安寧知濟川力
山翁捐世慮避暑長松裏絕壁無來人諸峰隔流水
橋危獨騎小江闊羣鷗亂喬木過風帆遙山滅雲漢
松杉白日冷樓閣青煙暝漁釣倚孤舟風波夜來定
青山宜野服白髮明谿水入暮幽思多微風樹聲起
空江白鷺起遠樹蒼煙合日落汎舟時長天見孤塔
煙寺微茫裏漁舟浩蕩前松聲薄暮起寒氣近江天
岸陰卻夏暑水影涵雲樹日暮詩已成長吟不歸去

題墨梅

弱水不可舟驅車誰能御羣仙六銖服飛度空中去
漠漠煙外姿娟娟坐中見分明銀屏影不隔宮妝面

積雪春不壞疏花冷逾馥心鄙漢阿嬌貯之黃金屋
月下逢素娥清輝寒相照應懷不死藥玉色長如少
橫枝交屈鐵疏蕊分羣玉同氣復同心相親不相瀆
孤花臨極浦半樹宜清景寂寂林下風娟娟月中影

題瓜圖

思子成消渴逢人說苦吟最憐貧病裏常有邵平心
西風吹落蔓白露成秋實對此憶甘寒令人失心疾

題粹中琅上人所藏墨蘭石

雨過蘭發馨枯禪定中起空林聞叱石一夜愁山鬼
三湘連斷岸九畹餘幽境墜露不聞聲落星空有影
幽蘭不爲佩白石不受礪寂寂高堂暮蕭蕭來遠風

泗濱足奇石澧浦多香草荆棘何足除芳堅宰相保

題墨蒲萄

小架青煙暝空林白露秋誰家一斛酒遂得守涼州
上苑根株少流沙道路長也知隨漢節終得薦君王

題墨竹石

雨籜化龍杖風枝咽鳳匏惟應林下石獨稱歲寒交

墨石枯木

人傳月中樹恐是山河影片石補天餘參差碧雲冷

墨龍

素壁吹大波高堂見神物野人不敢近雷電生翕忽

題水仙

月下湘水寒風迴漢皋夕明珠不可贈捐佩空相憶

六言絕句

荊門牖中

春光漸濃野燒晚色遙映炊煙茆店行人喚酒石橋流水通船

桑枝藹藹春暗桃樹霏霏晝晴古徑時逢婦汲閑門不斷人行

江畔纖纖細麥樹頭冉冉晴暉敗垣雞犬相逐古道牛羊自歸

七言絕句

清河口書所見

傳言八
濁浪生愁愁不禁坐見碧水醒人心無數飛花當棹落
幾家弱柳映門深

水市春深雲木稠行吟偶愛寺門幽老僧石上因畱客
稚子沙中學打球

溜溝舟中

人家時見小檐低水驛遙疑曲徑迷牆裏桃花多映戶
舍前桑樹總分畦

襍興

風吹木葉灑秋清憶在湖南江水行楚色高迷衡岳迴
湘波寒切壽沙明

秋興亭虛吞遠天郎官湖碧照寒煙記得往時黎別駕

坐吹簫管共回船

洞庭之東巴丘高在昔登臨詩思豪聞笛每吟清夜月
倚樓長對晚秋濤

老親坐堂白髮生諸弟治家幽意成引徑或通梅下過
疏泉多傍竹根行

夜坐

微月照人不可寐靜夜起坐向前除花邊犬吠時時近
竹裏螢流箇箇疏

忽憶

暮雪紛紛舞勢迴忽憶故園梅亂開江上已應千樹遍
眼中那得一枝來

寄黎別駕

正月已過二月新羈客愁生不知春近簾細草青尙短
隔屋小桃紅欲勻
臨水層軒相次開炎天幽夢擬頻來長江漠漠青天去
高鳥冥冥白日迴

訪友不值

故人已出閉幽室使我獨到去仍回夕陽樹裏猶疑見
殘雪街中更擬來

奉和存初院使二絕句

上林嘉木蔭連牆冉冉遊絲轉日光忽憶江南好晴景
碧谿春水照鴛鴦

御溝東畔粉爲牆
雲氣時時汎水光
花帶朱橋通蝶竦
柳齊碧瓦映鴛鴦

題貢有源壁閒墨竹一枝

一別湘江煙霧深
眼中見汝醒愁心
長疑碧水猶涵影
只恨清風未滿林

題方叔高歸羸集後

時叔高將歸九江

鳳皇城中木落時
空齋獨夜把君詩
最憐庾信腸堪斷
常恐陰鏗鬢蚤衰

歸客長途不可遲
千回欲發更題詩
佳人苦愛傾城笑
明月休生按劍疑

寄題進士宋翔仲夢鼎書室四首

潭安縣東金紫峰宋公舊隱隔雲松山人采蔗應常到
谿客尋花或未逢

聞道蔗南脩竹裏小堂清誦夜常勤煙中谷響遙相答
月下泉流靜始聞

宋家窗雞解人語談論往往能通玄祇應風雨長司旦
安用雲霄並得仙

石室南邊風滿林讀書之處亂雲深頗聞折桂來天上
猶憶捫蘿俯澗陰

題寒梅凍雀圖

寒雀雙棲碧玉條竹閒疏蕊暮蕭蕭幾回憶得江南路
雪樹參差暗野橋

和陳宗道元夕懷江南絕句

月下金渠照夜晴
雲閒玉管散春聲
綵鸞何處無消息
閒憶梅花坐到明

萬家行樂愛春晴
花底遙聞度曲聲
唯有客窗嫌月色
照人離恨太分明

駱駝圖

紫駝磔磔動秋雲
白草微茫臥夕曛
中土向來惟見畫
都門今日動成羣

次韻王繼志任大瞻訪臥病道者

游戲人間只寓形
空山瑤草爲誰青
歸來市上忘仙藥
臥向壺中悟道經

門前蒼檜古龍形一徑通幽接帝青羽容醉歸因示病
牀頭顛倒換鶯經

彰義門柳

送客都門見柳行幾回攀折斷愁腸如今自向城西別
無那柔條拂馬長

逢進包茅使

天子明禋盛禮儀楚邦供貢不曾遲令人卻恨夷吾死
不見包茅自入時

過真定尉佗先冢

殊方久識漢廷尊異代能忘聖主恩南粵若逢人借問
尉佗先冢至今存

平安驛

孤鐙夜宿平安驛欲寄音書無使將南雁數聲秋雨裏
卻先行客過瀟湘

野田

野田風露浥清秋扶耒歸來百不憂稚子未知耕作苦
阿翁懷裏學騎牛

咸寧縣

咸寧縣南山色青丁師橋畔水泠泠道邊松樹疑千歲
便擬尋仙煮茯苓

廣西卽事

南鎮干戈日夜陳西山寇盜出猶頻荒村百里無煙火

聞道官軍更殺人

比歲供輸不自聊祇今氛祲未全消
陣前將士須殊死
莫倚功多氣轉驕

安南人以紙立馬求賦梅華

江驛梅花晴照人
暗香冉冉拂衣巾
可憐結子依南土
未得移根近北辰

回雁峰

江上青峰宿雨開
江頭歸使日南來
登高欲訪平安字
二月衡陽雁已回

武昌春日

鸚鵡洲前芳草新
黃鶴樓下綠波春
隔花游女煙中語

不解明珠贈遠人

與黎別駕

夜聞車騎亦已到門外
雨急故難來明朝狂走須相覓
終日論文未可回
十分白石淨可悅無數幽花寒自妍
眼中此物差慰意
何得卽置小堂前

黃岡曉發

黃岡縣西路多石一夜風雨畏行難
雞鳴山月淨於洗
龍過谿雲溼未乾

石磴崎嶇出萬山平岡稍復慰愁顏
樹邊茅屋時時見
竹裏柴扉往往關

道傍荷花

驛路迢迢入萬松人家時見水芙蓉不堪翠蓋煙中冷
卻恨紅妝露下濃

小孤山

船度江天暮色青半江峰影動寒星海風忽起玄珠樹
山月遙生綠玉屏

海上夜失蓬萊山九江飛翠落雲閒仙人暮暮來絕頂
徑躡星辰朝九關

偶成

去年詔書禁乘馬今年詔下禁持弓猶聞白晝多豪客
騎馬射人官道中

金人擊鞠圖

駿馬如雲擊鞠馳衣冠彷彿正隆時
向來北地誇豪俊不省中原厭亂離

古松圖

一寸霜根歲月深養成千丈氣森森
畫師不欲開全樹來客徒能得古心

千歲虬枝截古苔餘姿猶自太山來
卽今梁棟俱爲用何得山林有棄材

偃蹇巴陵老樹枝黃昏風雨使人疑
神仙夜過還相識城市朝來獨未知

種樹常愁歲月遲老根千歲與仙期
惟應華表歸來鶴

曾見仙翁手植時

秋潭

百尺寒潭瀉碧峰
樹根漁艇少人逢
涼風忽起吹征雁
明月還來照臥龍

粟鼠圖

力盡秋原粟始黃
畫圖逢爾獨心傷
也知豐歲多遺穢
不比窮年耗太倉

和陳道之送子歸鄉并寄諸兄

弟兄不見長相憶
況復別離成老翁
忽夢謝池春草合
不知姜被幾時同

古屋秋風吹網絲
難兄誦得寄來詩
慙知薄暮思家處

正是清江過雁時

夜語燈前坐達明歸舟還送阿戎行微官漸得文章力
遠道能忘骨肉情

思君盡日令人渴忽見新詩手自書況有郎君如玉樹
鬪將花豔比紅蕖

卽事

五月鑿輿北狩時行人辛苦鬢成絲蹇驢日日愁風雨
官馬如雲不得騎

墨竹

嶰谷千年倚月明秋來風露最淒清自從截作軒轅律
別有新梢學鳳鳴

過長蘆追悼故運使趙希顏

此地經過憶往年沙頭樹色翠含煙故人何處今埋玉
歸客還來獨繫船
憶昔過君未見君重來何忍復相聞不成挂劍尋秋樹
空使題詩泣暮雲

舟行

倚江雲樹雜生苔風雨蕭蕭中夜來常時行過人不識
直榦已具棟梁材

漁家日落亂收罾欲及前舟苦未能行盡綠楊三十里
隔河遙見驛亭燈

無題

天台靈草滿谿香
縹緲鸞笙隔洞房
誰見桃源花樹裏
春來日日待劉郎

江頭芳樹碧重重
中有危樓對楚峰
盡日娉婷倚窗下
看花不使外人逢

樓上仙衣卷薄羅
樓前春暖杏花多
鳳簫最好吹明月
惟要蕭郎自教他

江草離離江水流
玉人何處卷簾鉤
垂楊學盡春來瘦
不省人間有別愁

潞縣舟中寄京師楊上舍諸公

買得吳船繫柳根
潞河新雨過黃昏
都門只隔煙中樹
一夜尋君苦夢魂

故人萬里俱爲客十度春愁九別離京國向來猶未覺
天涯明日倍相思

午門煙水浴輕鳧曾共花閒問酒壚楊柳青青舊時路
別來還解憶人無

二月和風滿上林憶君時復走相尋夜來見月堪腸斷
城鎖千門碧樹陰

生來不識酒中味憶昨故人常見招不是多情能度曲
尊前恨殺董嬌嬈

春風亭館看花時自變新聲教柳枝只恨秀娘空第一
不曾歌得斷腸詞

墨梅

天涯不見遙相憶窗下重逢乍欲迷彷彿空山明月夜
一枝初出古牆西

戲簡張伯貞

第二橋東綠柳新舞腰爭學楚宮春可憐張緒才情少
孤負長條不贈人

張生肆意輕流俗一室蕭然獨嘯歌幾度見人狂欲死
醒時常少醉時多

日暮醺醺出酒家更過鄰肆喚琵琶玉奴已伴他人宿
獨自歸來臥落花

寄王敏文

憐君臥病更傷離語盡燈前把臂時恨殺城南醉張紀

送行不寄一篇詩

月館花開厭獨居
故人別後意何如
衡陽直過瀟湘去
南雁來時好寄書

青樓只在石橋東
幾度聞君醉落紅
近日綠陰濃似雨
門前別繫玉花驄

碧雲冉冉汎清觴
明月娟娟照曲房
想爾此時逢謝女
愛渠中夜喚王郎

楊村

楊村岸頭驛使回
直沽洋裏海船來
軍夫伐鼓欺行旅
百里維舟不敢開

臨清

五月河橋繫客舟
舊來河水至今流
落花冉冉無消息
垂柳深深盡別愁

馮都水墓

舊鑿河流繞墓長
親栽隄樹與祠荒
行舟借問頻回首
過客傳聞總斷腸

孟陽津

孟陽津頭煙柳多
雞鳴臺下客帆過
誰家學舞翻紅袖
盡日含嚔惜翠蛾

櫂歌

河中日日水悠悠
誰道人心似水流
河水東迴有時直
人心屈曲幾時休

朝朝風雨送船行
白日無晴夜有晴
東岸蕪燈西岸見
中間猶自不明

河上風吹楊柳枝
河邊日落閉門時
前船好待後船至
南人莫被北人欺

行船日日恨船遲
船頭水聲無斷時
昨夜天晴好新月
誰家學得畫蛾眉

攀柳莫攀當路柳
繫船須繫上風船
當路人行無好樹
上風浪小得安眠

去年船裏逢端午
今年船裏又端陽
九節菖蒲本仙藥
如何曲曲似愁腸

生兒寧作漁家子
生女莫嫁征夫兒
征夫年年好遠別

漁家朝暮不相離

寧向泥中棄蓮子莫向水上種桃花蓮子出泥終見藕
桃花隨水不還家

寄李尙賓

久別思君欲白頭書來眞足慰離愁衡陽五月無回雁
江上常時獨倚樓

聞道齋居盡日幽可憐文采獨風流祇應湖上求如願
何用人閒問莫愁

隱隱青山湖水頭登山臨水惜同遊舟中只擬從元禮
月下空令憶子猷

和黎別駕

漢陽城東湖水碧大別山上高雲涼猶苦登臨近官舍
更將雞犬入山莊

山中野屋連修竹門外谿流半落花偶入青峰得樵徑
去尋白鹿到仙家

手種松株逾十尋家藏書卷直千金谿雲已任行時滿
山雪兼從坐處深

涼風滿地吹香稻明月當庭照短籬一夜空階聞落葉
平明和露取題詩

魏元君壇戲和陳彥高

池上仙房闕古臺世人傳是鍊丹來自從雲蓋空中滅
徒見風簾月下開

衡岳仙成只可聞
南昌何處覓元君
鄰兒狡似東方朔
偷得金桃不見分

道士焚香禮紫虛
故人題字滿齋居
可憐朱玉丁詞賦
不及文簫有韻書

赤壁圖

憶過臨臯訪大蘇
古祠寥落水禽呼
如何月夜黃州夢
卻在西風赤壁圖

過豐城

石泉灑灑照晴暉
山崦茸茸帶夕霏
憶得往時松下路
兒童相逐采樵歸

隔谿篁竹似吾廬
竹裏人家夜讀書
一去故園如昨日

春來頻夢帶經鋤

題宋道震棲霞山四景

谷口林廬映水涯
樹陰鳧雁近人家
春風恰似河陽縣
開遍山中處處花

水檻涵虛直翠微
風林當晝卻炎暉
青青石上長松樹
獨稱山人白氎衣

木落江南雁過時
獨行幽思少人知
多情宋玉風流在
馬上猶能寄楚詞

雪裏無人共酒杯
行吟處處只逢梅
月明自向前谿問
恐有扁舟到卻迴

題墨蒲萄

漢使歸朝歲月深
離宮別館翠陰陰
不因宛馬來中國
那得龍鬚徧上林

西域蒲萄滿玉壺
貢時常漬紫駝酥
向來天上沾餘瀝
今日湖南看畫圖

夜靜山庭映葉虛
秋來風架落藤疏
月明滿地無人到
時有幽人學草書

暑雨過庭龍怪生
南風吹架綠陰清
如今零落成秋實
猶作蕭疏弄月明

聞昔降龍過五湖
時因持鉢見龍鬚
近來窗下拋藤杖
忽悟衣中得寶珠

爲僧題松庵畫

架上龍鬚十丈陰
異方風土種來深
猶憐漢使通西域

未遣宛王見上林

蔡氏隱居

仙隱深深聞遠雞
青山別在郡城西
亦知好竹能開徑
只擬尋花共入谿

題畫

迢遞雲山隔遠谿
微茫煙水帶長隄
秋來木葉多搖落
日暮寒鴉不肯棲

遊園和吳光輔

雪外高亭倚竹根
石門幽徑躡苔痕
重來花發應千樹
只恐漁舟失洞門

送桃與孔學在李尙文

千歲仙桃不可期
摘來翻恨寄君遲
武陵太守如相問
莫道秦人始種時

題張天彝山水卷

江上晴雲起亂山
行人長慕釣舟閒
雙鴻更背湘潭去
南盡衡陽幾日還

送楊彥才歸南陽

南北雲山萬里餘
洞庭秋思近何如
故園獨傍隆中去
落木蕭蕭見草廬

雙燕圖贈王惟中

玄鳥飛時綠樹春
湖南煙際往來頻
明年社日君何處
逢著新巢憶故人

送姚景翔歸武陵

沙上清尊照舞裙
暫時相值卽相分
明年花發秦人洞
遇著漁舟定問君

方少府席上

故人之居湖水旁
別有幽墅炎天涼
聽詩自喜當明月
把酒先判盡夕陽

有酒其如醒者何
題詩予媿古人多
已辭醉後能騎馬
敢比書成欲換鵝

翠袖臨觴拂素筵
一嘖一笑使人憐
多情竹影畱歸騎
何處菱歌起別船

歸舟欲行且復住
故人有客解相存
也知爲米求彭澤

不是攜家隱鹿門

別劉煥宗

瀟湘江上舊逢君
無數青峰映白雲
明日扁舟卻相別
洞庭煙樹綠紛紛

題飲馬圖

一斛寒泉照紫騮
蕭蕭駿尾動高秋
夜來櫪上西風滿
憶傍寒雲飲隴頭

題蘭亭圖

勝日山陰共賦詩
風流猶想醉書時
如今池上無餘墨
長使人閒學斷碑

題輞川圖

摩詰歸來愛輞川清辭妙墨使人傳江山故業渾千變
文物餘風見百年

簡孔伯明知事

昔別長沙失送君岳陽音問日相聞幕中吏牘應稀少
時出藏書校古文

捕魚圖

落木蕭條沙渚空截江魚網暮含風天寒紫蟹應無數
便擬持螯坐短篷

題潘文學扇

聞說幽亭近水開微風時自竹閒來惟應爲客通三徑
盡日清談不遣回

簡鄧仁康

洞庭之南地卑溼況復長夏少相親歸舟夜發青楓底
忽到巴陵逢故人

簡善道原

湖南五月洞庭秋楊柳深深繫客舟遙憶郡齋無一事
題詩頻到岳陽樓

簡楊好問

湖亭初得寄來詩幾度長吟恨別離近日扁舟洞庭野
雨中多是憶君時

題畫松

石角槎牙折斷崖雨聲蕭颯動高齋忽疑落日翻林影

半樹參差照水涯

石上枯株老茯苓
尙餘孤幹倚青冥
若爲借向天河裏
夜夜浮槎載客星

太山祠下古時松
雷雨蒼茫色化龍
忽向人間見奇畫
老枝猶恐襲秦封

遙憶商顏松色青
女蘿枝上醉眠醒
自從四皓安劉後
歲暮何人采茯苓

題松庵上人墨蒲萄

磊磊玄珠得露垂
蜿蜿翠蔓與風宜
向西萬本無人見
時有山僧學一枝

奉使初從塞外過
車前煙蔓翠婆娑
江南妙墨今無數

未及張騫得見多

初月生林白露垂近檐秋色正離離西風一夜明珠滿
卻是驪龍睡著時

漢苑尋常露下時月明高架影參差上林近日無來使
腸斷江南見一枝

露顆含香近客衣蜜蜂胡蝶繞藤飛夜來應值驪龍睡
探得明珠月下歸

蒲萄十丈翠蜿蜒葉底驪珠萬箇懸昨日大風翻架倒
一枝吹墮衲僧前

南岳山僧工學幻空庭長愛翠婆娑若教親見宛西種
醉墨淋漓意更多

和宋子與送圭峰僧

飛錫翩翩去玉京也知富貴視來輕清江樹底天寧寺
講罷長廊看月生
官道垂楊接帝京飛花渾傍驛帆輕揚州南去春多雨
一夜船頭報水生

題山家小景

萬壑蒼蒼雲氣昏石泉斜落古松根前林欲暝僧歸晚
應聽鐘聲到寺門

浴鳧飛鷺聚寒塘落雁歸鴉映夕陽忽憶湖南煙樹裏
倚闌秋思正茫茫

松下孤亭映古茨幅巾來往靜相宜門前一水應如鏡

照見龍髯落半陂

窈窕松杉入白雲
千峰何處覓夫君
中洲雨過多芳草
誰見哦詩坐夕曛

門外千峰含綠姿
居人衣服似秦時
仙源直在桃花裏
世上漁郎未得知

清谿白石無人到
古木蒼藤徧水涯
日出羣鴉渾去盡
山雞照影獨多時

雁起秋空樹色遙
行人江上駐歸橈
海門東去應千里
白日微茫見落潮

花底谿流暖映空
石邊林氣翠含風
輕舟似識秦人洞
直上尋源或可通

酬楊伯謙

江路垂楊亂客愁
藕花時節憶同舟
鴛鴦鷓鴣頻相近
空使離人欲白頭

玉樹秋清白露垂
東遊取醉莫多時
金陵小妓能相惱
應解明璫乞贈詩

吳女嬌歌倚畫船
小紅輕翠映嬋娟
風流妬殺金陵子
費盡黃金學步蓮

題蒙孤峰小象

紫髯蕭森朔漠氣
白鬣飄飄巖石閒
絕似仙翁遺世慮
千株松下采芝還

題廖衡瞻墨梅

別來江樹雪參差
月夕尋常夢見之
昨日雙谿重照影
春風猶識歲寒姿

送孔庭會之桑江巡檢并簡鄧和仲虞伯雷二

憲掾

一騎弓刀入桂林
桑江孤障暮煙深
西南重地多烽燧
近喜羣偷已就擒

憲府諸郎總好文
將詩煩爲道殷勤
應憐小弟官同冷
日日登高望白雲

題蕭敬仲墨龍

閭闔迢迢白氣通
九江雲氣墨潭風
夜來仙仗無尋處
應向人間作歲豐

送蘭隱上人遊方

清江江頭芳草春
林深盡日不逢人
明朝散入千山去
葉葉清香是法身

題畫羅漢

流水濺濺出石閒
應真遊處碧波閑
惟應此去天台近
杖錫時時共往還

聽法歸來憶梵天
臨流坐石意蕭然
如何不作飛空去
卻愛山中弄石泉

寄趙德隆檢校

德隆名構相人父天綱字知微
時爲湘南憲副

紅葉千林對夕曛
黃花三徑蹋秋雲
雁來莫厭書頻寄
江上長吟正憶君

鍾陵城郭俯江波
畫省沈沈散玉珂
檢校幕中清似水
新詩應比別時多

臺憲今時倚舊臣
嚴君風采照湘濱
行騎驄馬逢南使
肯寄雙魚問遠人

題歲寒圖

梅花亂開脩竹裏
孤月正挂蒼松尾
空山歲晏憶同心
誰見幽人夜深起

半身松圖

老樹龍鱗雜古苔
晴窗雲氣撲衣來
惟應咫尺論千丈
莫以尋常擬大材

瓜圖

煙蔓蕭條帶守宮露團甘美熟秋風可憐舊日青門客
說著東陵似夢中

木芙蓉

別院秋風起翠帷美人樹底獨含思能言宋玉多情怨
腸斷東牆乍見時

金沙

青鳥遙從漢殿迴春風吹散九霞杯羣仙半醉歸時晚
絳節翩翩獨後來

先兄本意以壬申至乙亥夏爲初稟乙亥秋至丙
子夏爲南征稟則皆冠以揭文安公之序由丙子
夏以後爲使還新稟則虞文靖公實序之而刪甲

子至辛未爲牛鐸音則范太史之序存焉不幸早
亾旣而□□上率眾力刊之□□□□□□□□
□□□□□□□□□□□□□□□□□□□□
□□□□□□辰兵燬之後欲求正槁刊行而力弗
逮至壬戌夏偶得宋應祥伯禎鈔錄點校先兄正
槁予過稀年恐斯文之泯遂僭編次率眾力鋟梓
仍將此本參對或有文辭不同則兩存之庶使學
者有考焉所有文集陸續刊行時歲癸亥仲春新
喻曹谿傅若川次舟謹誌

傅與礪詩集卷之八